

Inatsisissatut siunnersuummut oqaaseqaatit

Nalinginnaasumik oqaaseqaatit1. Aallaqqaasiut:

a)

Siunnersuutikkut nutaaliorneq pingaarneq tassaavoq isiginnaartitsisarfeqarneq isiginnaartitsinikkullu eqqumiitsuliorneq, Kalaallit Nunaata Isiginnaartitsisarfiata pilersinnissaa aamma isiginnaartitsisartussanik ilinniartitsinerup Kalaallit Nunaata Isiginnaartitsisarfiata pilersinnissaa pillugit inatsisiliorneq.

Siunnersuummi isiginnaartitsisarfeqarneq aamma isiginnaartitsinikkut eqqumiitsuliorneq pillugit naalakkersuinnikkut takorluukkat inatsisissatut siunnersuutip siunertaata oqaasertalerneqarneratigut aalajangersarneqarput. Siunertaavoq inuussutissarsiutigalugu isiginnaartitsinikkut eqqumiitsuliornerup inatsisitigut killiliussissutigineqarnissaata isumannaarneqarnissaa, isiginnaartitsisarnermi kulturi siuarsarnissaa kiisalu inuussutissarsiutigalugu namminerlu kajuminnikkut isiginnaartitsinikkut eqqumiitsuliornerup nuna tamakkerlugu siuarsarlugulu ineriartortinnissaa, tak. siunnersuummi § 1.

Siunnersuummi pingaarneq tassaavoq Kalaallit Nunaata Isiginnaartitsisarfiata pilersinneqarnissaa. Kalaallit Nunaata Isiginnaartitsisarfiata tassaavoq Kalaallit Nunaanni Inuiaqatigiit Isiginnaartitsisarfiat illuinaasiunngitsumillu pilersitassaralugit isiginnaartitsinikkut eqqumiitsuliornerup iluani eqqumiitsuliornikkut pitsaassuseqarluartumik takutitsisarnikkut aliikkusersuisarnissaaq. Kalaallit Nunaata Isiginnaartitsisarfiata ingerlatsinera kalaallit kulturiannik ileqquinillu aallaaveqassaaq, ilutigisaanillu qanorluunniit ukiulinnut tamanut takutitseriatsit tamatigoortut isumagissallugit.

Siunnersuut aammattaq imaqarpoq isiginnaartitsinermik ingerlatsiviit allat nutaamik isiginiarneqarnerannik, tamatumunnga ilanngullugit sumiiffinni ataasiakkaani eqqumiitsuliornermik suliaqarlutik isiginnaartitsiviit, ilaatigut tassaasut nammineq kajuminnikkut isiginnaartitsisarnerit, meeqqanut isiginnaartitsisarnerit misileraallunilu isiginnaartitsisarnerit. Taakkununga atatillugu aalajangersarneqarpoq, Naalakkersuisut isiginnaartitsinermik ingerlatsiviit allat tapiiffigisinnaagaat

Tassunga nangissutitut oqaatigineqassaaq siunnersuut § 13-imi Kalaallit Nunaata Isiginnaartitsisarfianut immikkut pisussaaffiliinermik imaqarmat, tassalu nammineq kajuminnikkut isiginnaartitsisarfinnik allanillu sumiiffinni ataasiakkaani isiginnaartitsisarfinnik isiginnaartitsisarfinnik ingerlatsinermik isiginnaagassiornermillu ilitsersuinissamik. Aalajangersakkap ilanngullugu aalajangerpaa, isiginnaartitsisarfiup qinnuigineqarneq aallaavigalugu aamma atuarfiit ilinniarsiillu isiginnaartitsivinnik ingerlatsinermik siunnersortassagai.

Kalaallit Nunaanni isiginnaartitsisartoqarnerup ineriartortinneqarlunilu siuarsarneqarnissaa siunnersuutip aalajangersagartaani tamaniippoq, erseqqillunilu isiginnaartitsisartunik Kalaallit Nunaata isiginnaartitsisarfiata ilinniartitsinissamik aqqissuussinerup pilersinneratigut. Aammattaq siunnersuutikkut tamanut isiginnaartitsisarnermik suliaqartunut soqutigisaqartunulluunniit pikkorissannissaaq periarfissinneqarpoq.

Siunnersuut kapitalinut arfinilinnut agguataarneqarpoq:

- Kapitali 1-ip imarai siunertaq nassuiaatillu.
- Kapitali 2-p imarai Kalaallit Nunaata Isiginnaartitsisarfiata
- Kapitali 3-p imarai isiginnaartitsisartut ilinniartitaaneq pikkorissartitsisarnerlu
- Kapitali 4-p imarai ilitsersuutit
- Kapitali 5-ip imaraa isiginnaartitsisarnermik ingerlatsivinnut allanut tapiissuteqartarneq

- Kapitali 6-ip imaraa atuutilersitsineq

b) Inatsisissatut siunnersuummi pingaarnertut tunuliaqutaasoq

Kalaallit isiginnaartitsisarnerisa isiginnaartitsisarfeqarnerullu isumannaarneqarnissaat taakkulu siuarsarneqarlutillu ineriartorteqqinneqarnissaannik kissaat Naalakkersuisut Inatsisartullu ukialunni kulturikkut politikiminni pingaartitarisimavaat. Kultureqarneq pillugu nassuiaammi 2004-meersumi aamma Kulturrådímik 2006-imi kulturimut tunngasut tulleríiaríffíqíneqarnissaat pillugu taamani Naalakkersuisuusut isumaqatigiissuteqarneranni isiginnaartitsiveqarneq suliniuteqarfissatut siunniunneqarpoq. Naalakkersuisut 2009-2013-mut suleqatigiinnissamik isumaqatigiissutaanni allaqqavoq, Naalakkersuisut isiginnaartitsisarfeqarneq pillugu inatsisiliornermik suliaq naammassisagaat.

Kulturi pillugu naalakkersuinikkut oqallinnerni isiginnaartitsisarfirmik pilersitsisinnaaneq immikkut eqqaaneqartarpoq: Isiginnaartitsisarfik Kalaallit Nunaanni isiginnaartitsisarnermi kulturikkut isumassarsiorfittut, siunnersuisutut, ineriartortitsisutut isiginnaartitsinermilu tunngavíusinnaasoq.

c) Malittarisassiornermik piareersaanermi pingaarnertut:

Isiginnaartitsisarfeqarnermut tunngasuni ineriartortitsineq Naalakkersuisut suli eqqumaffíqísoqújusuaat pingaartillugulu nunap isiginnaartitsisarfanik pilersitsinerup isiginnaartitsisarfeqarnermut isiginnaartitsisarnermullu tunngasunik samminneqqílernermut pítsaasumillu ineriartortitsinermut naggasiutitut isigíneqanngínnissaa aallartitsinertulli isigíneqarnissaa.

Tamanna píssutíqalugu Inatsisartut inatsisíssaattut siunnersuutíq matuma sulíaríneqarnerani Naalakkersuisunit qanímut suleqatíqíneqarput Sílamíut, KAISKA, Kalaallit Atuakkiortut aamma taamani Kulturrádusoq.

2. Siunnersuummi pingaarnertut:

a) Inatsisít atuuttut:

Isiginnaartitsiveqarneq ímaluunniít isiginnaartitsíníkkut eqqumíitsulíornerít píllugít ataatsímóortumík maannakkut inatsíseqanngílaq.

Isiginnaartitsíneq kóntó píngaarneq 40.95.03, Isiginnaartitsíneq (tápííssutíník aníngaaalííssutít), atorlugu tapííffíqíneqartarpoq, tassanílu ersípípoq 2010-mut 1,752 mío. kr. aníngaaalííssutíssatut ímmíkkóortíneqarsímasut.

Tamatuma saníatígut oqaatíqíneqassaaq isiginnaartitsívínnut allanut isiginnaartitsínírmíllu sulíníutínut kulturímút aníngaaalííssutínít aamma típsínermít lóttórnírmíllu ísértítaní tapííssuteqartóqarsínnáasoq, kulturikkut íngírlatsíneq sunngíffímmílu sammsíssaqaartítsíneq píllugít Inatsisartut peqússutaanni nr. 10-mí, 21. máj 2002-meersumí kápítalí 8 aamma típsínermít lóttórnírmíllu ísértítat agguaanneqartárnerat píllugu Inatsisartut inatsísáat nr. 7, 1. júni 2006-ímeersoq naapertórlugít. Taamaattumík isiginnaartitsiveqarnermut isiginnaartitsíníkkullu eqqumíitsulíornermut tapírsííníssamut períarfíssat ullumíkkut marlóqíusaapput.

Maanna Kalaallit Nunaanni isiginnaartitsisartutut ílíníarfeqanngílaq Sílamíulli ílaatígut assígínnígítúník ílíníartoqárnermík aaqqíssuusíssarsímapput. 2008-mí mísílígutitut sulíníummí arfíneq marlunník ílíníartoqárnermí paasínarsísimávoq isiginnaartitsisartut nutaartaqalérnissáat soqutígíneqarlunílu písaríaqartíneqartóq.

b) aaqqíssuusíneq inatsísíssatut siunnersuummí síunniunneqartóq:

Siunnersuummí kápítalí 1-ímí inatsímí síunírtáq aalájangersarneqarpoq, tassaalluní ínuussutíssarsíutíqalugu isiginnaartitsíníkkut eqqumíitsulíornerup inatsísítígut kíllílíussíssutígíníssaata ísumannaarneqarníssaa, isiginnaartitsisarnermí kulturíp síuarsarníssaa kíisalu ínuussutíssarsíutíqalugu

namminerlu kajuminnikkut isiginnaartitsinikkut eqqumiitsuliornerup nuna tamakkerlugu siuarsarlugulu ineriartortinnissaa. Tamatuma saniatigut oqaatsit "isiginnaartitsinikkut eqqumiitsuliorneq", inuussutissarsiutigalugu" kiisalu "kajuminnikkut".

Siunnersuummi kapitali 2 Kalaallit Nunaata Isiginnaartitsisarfianut tunngavoq. Tassani aalajangersarneqarpoq Kalaallit Nunaata Isiginnaartitsisarfia tassaasoq pisortat suliffeqarfiutaat imminut ingerlattoq siulersuisunit tallimanik ilaasortalinnit aqunneqartoq, taakku ataatsimoorlutik isiginnaartitsisarnermut ilisimasaqarluartuussallutik aqutsinikkullu ilisimasaqartuussallutik. Tamatuma saniatigut siulersuisut katitigaanerat piffissarlu qinigaaffigisartagassaat pillugit malittarisassiortoqarpoq. Tamatumunnga nangitsissutitut siulersuisut isiginnaartitsisarfiullu pisortaata akisussaaffii suliasaallu pillugit aalajangersaasoqarpoq.

Kalaallit Nunaata Isiginnaartitsisarfiarik siulersuisulimmik pilersitsinikkut aningaasaqarnikkut killiliussat eqaannerusumik naammassineqarnissaat namminerlu aqutsinerulernissaq ujartorneqarpoq. Taamaalilluni aamma isiginnaartitsisarfiup aqutsinikkut, ingerlatsinikkut eqqumiitsuliornikkullu ingerlatsineranut atatillugu politikimut atajunnaarnissaq siunertaavoq. Tamatumani aamma niuernikkut tunngaviit tunngavigineqarnissaannut aqutisullu Kalaallit Nunaata Isiginnaartitsisarfia pisariitsumik ingerlalluatumillu ingerlanneqarsinnaanngorlugu taamatut atugassiinnaatitaanissaanut periarfissat annertusarneqarnissaat siunertaavoq. Tamanna angusassatut isumaqatigiissutit assigisaasaluunniit aqutisissutitut atorneqaannarsinnaanerannut akornutaanngilaq Naalakkersuisulli taama ittumik pilersaaruteqanngillat, tassami siunertaq maanna Silamiunik kiffartuunneqarnissamik isumaqatigiissuteqarnermi tunuliaqutaasoq inatsimmi killiliussani naammassineqartutut isigineqarmat aningaasaliissutitigut tunngavigineqartut aningaasanut inatsimmi aalajangersarneqartut ilanngullugit.

Inatsisissatut siunnersuummik piareersaanermut suliarinninnermullu atatillugu arlaleriarluni eqqartorneqartarsimavoq Kalaallit Nunaata Isiginnaartitsisarfianut siulersuisut pisariaqartinneqartumik ingerlalluartsinissamut ineriartortitsinissamullu sunik pinnaasaqarnersoq, piginnaaneqarluni ilisimasaqarlunilu. Ilaatigut siulersuisut katitigaaneranni aqutsinikkut ilisimasaqarnerusut ilaatinneqarnissaat isumaliutigineqarsimavoq. Tamanna siunnersuummi ilanngunneqarpoq.

Siunnersuummi §§ 8-9-mi Kalaallit Nunaata Isiginnaartitsisarfiata sulineranut pingaarnertut killiliussat aalajangersarneqarput. § 8-mi aalajangersarneqarpoq Kalaallit Nunaata Isiginnaartitsisarfia Kalaallit Nunaata tamarmi isiginnaartitsisarfigissagaa illuinnaasiunngitsumillu pilersitassaralugit isiginnaartitsinikkut eqqumiitsuliornerup iluani eqqumiitsuliornikkut pitsaassuseqarluartumik takutitsisarnikkut aliikkusersuisarnissaq. Kalaallit Nunaata Isiginnaartitsisarfiata ingerlatsinera kalaallit kulturiannik ileqquinillu aammattaarli nunanut tamalaanut sammisumik aallaaveqassaaq, ilutigisainillu qanorluunniit ukiulinnut tamanut takutitseriatsit tamatigoortut isumagissallugit. § 9-mi aalajangersarneqarpoq Kalaallit Nunaata Isiginnaartitsisarfiata isiginnaartitsissusiani isiginnaartartunut tusarnaartartunullu amerlasuunut takuneqarsinnaatissagai tusarnaarneqarsinnaatillugillu, isiginnaartitsinikkut, tassunga ilanngullugu angalaarluni isiginnaartitsiartortarnikkut, radiukku tv-kkullu aalakaatitsinikkut kiisalu immiussanik tuniniaanikkut. Aammattaq aalajangersarneqarpoq isiginnaartitsinerit angalalluni isiginnaartitsiartortarnikkut nunamut tamarmiusumut tunngatinneqassasut nunanilu allani angalalluni isiginnaartitsiartortoqartassasoq.

Siunnersuummi § 10-mi aalajangersarneqarpoq Kalaallit Nunaata Isiginnaartitsisarfia qanoq aningaasalersorneqassanersoq malittarisassallu suut malillugit missingersuusiortoqartassanersoq, naatsorsuuserisoqarluni naatsorsuusiortoqarlunilu.

Siunnersuummi kapitali 3 isiginnaartitsisartutut ilinniartitaanermut pikkorissartitsisarnermullu tunngavoq. § 11-imi allassimavoq Kalaallit Nunaata Isiginnaartitsisarfiata suliassarigaa isiginnaartitsisartunik ilinniartitsinissaq, isiginnaartitsisartutut ilinniartitaaneq aqutigalugu. Tamatumunnga nangitsissutitut aalajangersaasoqarpoq Ilinniartitaaneq pillugu siunnersuisoqatigiinnik pilersitsiso-

qassasoq ilinniartitaanerup pitsaassusianik qularnaarisussanik. Tamatuma saniatigut aalajangersarneqarpoq Naalakkersuisut Kalaallit Nunaata Isiginnaartitsisarfiannik isumasioqateqareerlutik isiginnaartitsisartutut ilinniartitaaneq pillugu erseqqinnerusumik malittarisassiussasut, taakkununga ilanngullugit ilinniartussanik tigooqqaaneq, atuartitsineq soraarummeersimanermullu uppernarsaasiisarneq pillugit. Kiisalu ilinniartitaanermut ilinniarnermut aaqqissuussinerup suliarineqarnissaa akuerineqarnissaalu pillugit aalajangersaasoqarpoq.

Silamiut isiginnaartitsisartoqarnikkut aaqqissuussineq pillugu saqqummiussinikuupput, tassanilu allaaserineqarput ilinniartut qassit ilinnialertartussatut ilimagineqarnersut (ukioq allortarlugu ilinniartut 5), ilinnialernissamut piumasaqaatit, aaqqissuussinerup aaqqissugaanera, ilinniartitsineq aamma ilinniakkap allaaserinerata imarisai. Saqqummiussami ersersinneqarpoq, maannakkorpiaq piviusorpalaartuussanngitsoq isiginnartitsisartunngornianik ilinniartitsinerup Nunani Avannarlerni allani ilinniakkanut assingusup pilersinnissaa, atortutigut inutigullu kiisalu ilinniartitsisutugit amigateqarneq pissutigalugu. Saqqummiussaq Kultureqarnermut, Ilinniartitaanermut, Ilisimatusarnermut Ilageeqarnermullu Aqutsisoqarfimmu saqqumiunneqarnikuuvoq, tassangaannillu nalunaarutigineqarpoq ilinniagaq saqqummiussami allaaserineqartoq akuerineqarsinnaasoq, Inatsisartut isiginnaartitsisarfeqarneq pillugu inatsisissatut siunnersuut akuerissappassuk, ilinniakkamut siunnersuisoqatigiinnik Kalaallit Nunaanni isiginnaartitsisarfeqarnerup iluaneersunik suliamut ilisimasalinik pilersitsisoqarpat, ilinniakkallu aaqqissugaanerata allaaserinera Kalaallit Nunaata avataani isiginnaartitsisartunngornianik ilinniartitsinerup sapinngisamik annertunerpaamik naleqqussarneqarpat, isiginnaartitsisartunngorniat nunatsinneersut nunani allani qaffasinnerusumik ilinniagaqaaqqik-kumasut ilinniarnerminnik sivikillisaanneqarsinnaaqqullugit.

Aammattaq Aqutsisoqarfiup nalunaarutigaa, Kalaallit Nunaanni isiginnaartitsisartunngorniarluni ilinniagaq Namminersorlutik Oqartussat ilinniakkanut nalunaarsuiffiannut inuutissarsiummik ilinniakkatut suliamik ilinniagaqarsimasutut killiffik ataallugu inissisimalluni ilinniagaqarnerisiaqarfiusinnaasutut nalunaarsorneqarsinnaasoq. Taamaammatt ilinniakkami ilinniartut ilinniagaqarnerisiaqarsinnaasapput, ilinniagaqarnerisiaqarnissamut malittarisassani piumasaqaatit eqquutikkunikkit, tamatumunnga ilanngullugit attuumassuteqartuunissaq pillugu aalajangersakkat.

Siunnersuummi § 12-imi aalajangersarneqarpoq Kalaallit Nunaata Isiginnaartitsisarfiata kikkunnut tamanut isiginnaartitsinermik ingerlataqartunut soqutigisaqartunulluunniit pikkorissartitsinermik neqerooruteqarsinnaasoq.

Siunnersuummi kapitali 4 Kalaallit Nunaata Isiginnaartitsisarfiannut immikkut pisussaaffiliinermik imaqarpoq, tassalu nammineq kajuminnikkut isiginnaartitsisarfinnik allanillu sumiiffinni ataasiakkaani isiginnaartitsisarfinnik isiginnaartitsisarfinnik ingerlatsinermik isiginnaagassiornermillu ilitsersuinissamik. Aalajangersakkap ilanngullugu aalajangerpaa, isiginnaartitsisarfiup qinnuigineqarneq aallaavigalugu aamma atuarmi ilinniarsiillu isiginnaartitsivinnik ingerlatsinermik siunnersortasagai.

Siunnersuummi kapitali 5-imi aalajangersarneqarpoq isiginnaartitsivinnut allanut isiginnaartitsinermillu suliniutinut kulturimut aningaasaliissutinit aamma tipsernermit lottornermillu isertitanit tapiissuteqartoqarsinnaasoq, kulturikkut ingerlatsineq sunngiffimmilu sammisasaqartitsineq pillugit malittarisassat qaqugukkulluunniit atuuttut naapertorlugit, tapiissutillu ingerlatsinermut tapiissutitut tunisassiornermullu tapiissutitut tunniunneqarsinnaasut.

Kiisalu siunnersuummi kapitali 6-imi atuutilersitsineq pillugu aalajangersagaqarpoq tassani allasimavoq isiginnaartitsisartunngornianik ilinniartitsineq aatsaat 1. august 2011-miit atuutilerluni pilersinneqassasoq. Tamatumunnga ilaatigut pissutaavoq, siunertamut naapertuuttut isigineqarmat isiginnaartitsisartutut ilinniarnernup ukioq atuarmiisoq nalinginnaasoq maleruarpagu, ilaatigullu Kalaallit Nunaata isiginnaartitsisarfiata ilinniakkap ineriartortinnissaanut sulisussat pisariaqartinneqartut

atorfinitinnissaannut ilinniakkallu aallartinnissaata piareersarnissaanut piffissaqarnissaa pisariaqarmat. Isiginnaartitsisartutut ilinniartitaanermut tunngatillugu ilisimatitsissutigineqarsinnaavoq maanna Silamiunit tunngavissiaq pigineqarmat tassani aamma aaqqissuussinissamut missingiut siullesq ilinniartitaanerullu aaqqissugaanissaa pillugu isumaliutit ilaallutik. Isiginnaartitsisartutut ilinniartitaaneq pillugu nalunaarusiorneq pillugu sulineq aallartinneqarpoq.

Taamaattumik siunnersuut manna kultureqarnerup inatsisiliorfiginerani nutaaliornuvoq pingaarutalik. Siunnersuut isiginnaartitsisartoqarneq pillugu kulturikkut ingerlatsineq sunngiffimmilu sammisassaqtitsineq pillugit peqqussummi taaneqartunut taartaasutut taaneqarsinnaanngilaq, tassami siunnersuut imarisamigut, takorluukkamigut siunertamigullu kulturikkut ingerlatsineq sunngiffimmilu sammisassaqtitsineq pillugit peqqussummi isiginnaartitsinerit pillugit aalajangersakkanut naleqqiunneqarsinnaanngimmat.

3. Allaffissornikkut aningaasatigullu pisortanut kingunerisassat:

Konto pingaarneq 40.95.03, Isiginnaartitsineq (tapiissutini aningaasaliissutit) aqutigalugu, 2010-mut aningaasanut inatsimmi isiginnaartitsinermik ingerlatsinermut isiginnaartitsinikkullu ingerlataanut allanut tapiisoqarpoq. Missingersuutitut oqaaseqaatini ersippoq, tapiissutit sapinngisamik aalajangerneqassasut isiginnaartitsisarfirmik sullissinissamik isumaqatigiissuteqarnikkut, siunertamullu tamatumunnga aningaasaliissutit salliutillugu atorneqassasut inuutissarsiuutigalugu eqqumiitsuliornikkut ingerlassanut. Aningaasaliissutit 2010-mi 1,752 mio. kr.-iupput, ukiunilu missingersuusiorfiusuni 1,8 mio. kr.-iullutik.

Maanna Silamiut 2010-mut atatillugu sullissinissamik isumaqatigiissuteqarfigineqarput. Sullissinissamik isumaqatigiissut naapertorlugu 2010-mi Silamiut 1,752 mio. kr.-inik aningaasaliiffineqarput, imaappoq kontomi pingaarnermi 40.95.03-mi isiginnaartitsisarnermut aningaasaliissutit imikkooortitat tamakkerlugit.

Immikkoortoq 2, Maleruagassat atuuttut ataanni eqqaaneqartutut, isiginnaartitsisarfiit allat isiginnaartitsinermillu suliniutit kulturimut aningaasaliissutinik aamma tipsernermit lottornermillu isertitanit tapiissuteqartoqarsinnaanera periarfissaqarpoq, kulturikkut ingerlatsineq sunngiffimmilu sammisassaqtitsineq pillugit Inatsisartut peqqussutaanni kapitali 8 aamma tipsernermit lottornermillu isertitat agguanneqartarnerat pillugu Inatsisartut inatsisaat nr. 7, 1. juni 2006-imeersoq naapertorlugit. Periarfissaq taanna ingerlaannassaaq.

Inatsisissatut siunnersuutikkut siunnersuutigineqarpoq Isiginnaartitsinermut kontomi pingaarnermi 40.95.03-mi aningaasaliissutit 3,7 mio. kr.-inik 2011-mi qaffanneqassasut, qaffakkiartortinneqarlutillu 2012-mi 5,8 mio. kr.-inik 2013-imilu 7,0 mio. kr.-inik. Tamanna Naalakkersuisut 2011-mut Inatsisartut Aningaasanut Inatsisissaattut siunnersuutaanni ersippoq, tassanilu aningaasaliissutit kontomut pingaarnermut 20.11.70, Suliniutinut nutaanut sillimmatit, inissinneqarput, inatsisip akuerineqarnissaata tungaanut, tamatuma kingorna aningaasaliissutit kontomut naapertuuttumut nuunneqarumaarlutik. Tamatumunnga atatillugu Kalaallit Nunaata Isiginnaartitsisarfia pillugu konto pingaarneq nutaaq pilersinneqassasoq naatsorsuutigineqarpoq.

Aningaasaliissutit taakku Kalaallit Nunaata Isiginnaartitsisarfiata ingerlannera matussusissavaat suliassat siunnersuummi allaaserineqartut ilaatillugit, kisiannili isiginnaartitsisartussanik ilinniartitsineq pinnagu, tamanna naatsorsuutigineqarpoq ilinniartitsinermut pilersaarut aqutigalugu aningaasalersorneqassasoq ukiunit missingersuusiorfiusuniit konto pingaarnermi 21.11.61, Ilinniartitaanermut sillimmatini aningaasaliissutit siuarternerisigut. Naatsorsuutigineqarpoq ukiumut 0,9 mio. kr.-inik aningaasaliisoqartassasoq, taamaattorli 2011-mi taamaallaat 450.000 kr.-inik, ilinniagaq aatsaat 1. august 2011 aallartissasoq naatsorsuutigineqarmat. Aningaasaliinerunerit ataatsimoortut taakku ilanngullugit Kalaallit Nunaata Isiginnaartitsisarfianut aningaasaliissutit ataatsimoortut

2011-mi 6,0 mio. kr.-iussapput, 2012-mi 8,5 mio. kr.-inut qaffariarlutik 2013-imilu 9,9 mio. kr.-inut qaffariarlutik.

Kalaallit Nunaata Isiginnaartitsisarfianut aningaasaliissutit ukiut ingerlanerini qaffakkiartortinnerannut pissutaavoq, isiginnaartitsisarfik inerisariartuaarneqartussaammat. Taamaalilluni 2011-mi ingerlatsinerup ilusaa pilersinneqassaaq, isiginnaartitsisartut aalajangersimasumik atorfeqartussat atorfinitsinneqarlutik isiginnaartitsisartussatullu ilinniartitsineq aallartinneqarluni. 2012-mi isiginnaartitsisartussanik ilinniartitsineq ingerlaqqissaaq, isiginnaartitsinermik siunnersorteqarneq pilersinneqarluni, isiginnaartitsissutaasartullu annertusineqarlutik. 2013-imi Kalaallit Nunaata isiginnaartitsisarfia tamakkiisumik ingerlalersimassaaq, tamanna pillugu piumasaqaatit naapertorlugit (tamanna pillugu ataani allaqqasut takukkit). 2013-imissaaq isiginnaartitsisarfik illutaalu nalilerneqassapput. Tassunga ilanngunneqassapput siulersuisut aningaasarsiaannut aningaasartuutaannullu taarsiissutinut aningaasartuutit.

Kalaallit Nunaata Isiginnaartitsisarfiata ingerlanneranut aningaasaliissutinut, isiginnaartitsisartussanik ilinniartitsineq ilanngullugu, tunngaviuvoq inuiaqatigiit isiginnaartitsisarfiat aningaasatigut toqqammaveqartariaqarmat, tunngaviusumik ingerlannissanik qularnaarisumik. Tamatumani ilaatigut pineqarput sulisut naammattunik amerlassusillit eqqortunillu pisinnaasallit, ininut aningaasartuutit, suliniutinut aningaasartuutit isiginnaartitsinerit aqqissuunnerinut, angalaarluni isiginnaartitsinernut aamma isiginnaartitsisartussanik ilinniartitsinermi ilinniartunut naleqqiullugu suliasat isumaginisaaannut.

Silamiut aallartikkamilli suliniutinik ingerlatsisarlutik isiginnaartitsisartuupput. Taamaalilluni Namminersorlutik Oqartussanit tapiissutit annerusumik tunngaviusumik ingerlatsinissamik qularnaarisuusimapput, isiginnaartitsinerilli imaluunniit angalalluni aliikkusersuiartortarnerit ataasiakkaat suliniutit atasiakkaarlugit pilersaarusiukkatut ingerlanneqartarsimallutik, taakkunungaluni Nuna Fondimit, Kulturimut aningaasaliissutinut, tipsernermit lottornermillu aningaasanit, kommuninut il.il. tapiisoqarnissanik qinnuteqartoqartarpoq.

Siunnersuutip matuma Naalackersuisunit suliarineqarneranut atatillugu pingaarutilittut taasariaqarpoq, aammattaaq Kalaallit Nunaata Isiginnaartitsisarfiata suliniutinut sivikitsumik sivisuumilluunniit ingerlanneqartussanut aningaasaateqarfinit allanit allatullu avataanit aningaasaliisoqarnissanik qinnuteqartarnissaa erseqqissumik naatsorsuutaasoq. Aningaasaateqarfiit ilaat sullissiveqarfinni suliniutinut ingerlatsinermut pisortanit aningaasalersorneqarnerusunut tunuarsimaaraluarpataluunniit Kalaallit Nunaata Isiginnaartitsisarfiata suliniutinut aningaasaateqarfinit tapiiffigineqarsinnaanissaa naatsorsuutigineqarpoq. Tamatumunnga atatillugu eqqaaneqarsinnaavoq Det Kongelige Teater Danmarkimiittoq naalagaaffiup suliffeqarfiutigimmagu tamannalu isiginnaartitsisarfiup sulineraata aamma aningaasaateqarfinit suliffeqarfinnullu aningaasaliisartunit tapiiffigineqartarneranut akornutaanani. Nuna Fonden maannamut Silamiut suliniutaannut annertuumik tapiisarpoq. Tapiisarnissamut aningaasaateqarfimmit piumasaqaataasut aallaavigalugit suliniutinut sullissiveqarfimmit pisortanit ingerlatsinermut aningaasalersorneqartumit isumagineqartunut tapiinissaq akornutissaqanngilaq.

Inatsisissatut siunnersuutikkut siunertaavoq Kalaallit Nunaata Isiginnaartitsisarfiata isiginnaartitsisarnermi aallaavigissagai illut pioreersut. Silamiut maannakkut ininik atugaqarput Radiup illorsuakuani aammalu isiginnaartitsinerni anginerusuni Katuaq atorneqartarluni. Piffissarli ungasinnerusooq eqqarsaatigalugu naatsorsuutigisariaqarpoq, ininut naammaginarunnaassasut, ilaatigut isiginnaartitsisutit suliarinerannut isiginnaartitsinermilu atorlutit paarineqarnerannut naleqqiullugu. Sanaartukkatiigut pisariaqartitat Isiginnaartitsisarfik peqatigalugu Naalackersuisut ingerlaavartumik naliliivigisasavaat, pisariaqartitaasinnaasullu aningaasanut inatsimmi aningaasaliissutissatut missingiusiarineqartussatut kissaatini ilanngunneqartarumaarlutik.

Maanna inigisat allanilu attartorsinnaanermut periarfissakilliornerup ingerlassat annertusinissaat ilaatigut killilerpaat. Naalakkersuisut nalilerpaat, Kalaallit Nunaata isiginnaartitsisarfia manna ingerlanneqartartut marloriaatinngortinneqarnissaat qularnaarlugu aningaasaliisoqartariaqartoq, taamatullu isiginnaartitsinerit ullumernit annertunerusut amerlanernillu inuttaqartut aqqissuunneqarsinnaasariaqartut. Tamanna pillugu Silamiut oqaloqatigisarnerat tunngavigalugu missingiunneqarpoq, akissarsianut aningaasartuutit maanna 1,3 mio. kr.-iusut ukiumut 5,5 mio kr.-inut qaffannissaat pisariaqartinneqassasoq. Tamatumunnga ilaapput piffissaq tamaat isiginnaartitsisarfimmi pisortamik atorfeqartitsiuarnissaq, allaffimmi pisortap nittarsaassinermillu suliaqartup atorfiisa qaffannissaat, atorfinnit ullup affaa suliffiusartunit marlunniit ulloq naallugu suliffiusartunut marlunnut, qulinerinermut teknikerimik piffissaq tamaat sulisartumik atorfeqartitsiuarnissaq, isiginnaartitsinerinermut siunnersortimik nutaamik atorfinitsitsinissaq, ilinniartitsinerinermut akisussaasussamik ullup affaa sulisartussamik nutaamik atorfinitsitsinissaq taakkualu saniatigut suliniutini sulisartussanik atorfinitsitsinissamut periarfissaqarnissaq. Kingulliullugit pineqartut tassaasinnaapput dramatikkerit, ilitersuisartut, atortulerisut, mersortartut, balletimik ilusiliisut, nipilersortartut, isiginnaartitsisarfimmi sanasut, saffiut, isiginnaartitsisarfimmi qalipaasut, isiginnaartitsiviup kiluanik aqqissuisartut, pinner-saasartut il.il.

Akissarsianut aningaasartuutit qaffannerisa saniatigut "ingerlatsinerinermut aningaasartuutit allat" qaffaaviginissaat pisariaqartinneqassaaq 0,4 mio. kr.-init 1,7 mio. kr.-inut, taamatullu suliniutinut annertunerusunik aningaasaliisoqartariaqassalluni. Aningaasartuutinut naatsorsuuteqarfiup taassuma ataani ilanngunneqassapput siulersuisut aningaasarsiaannut aamma siulersuisunut ilaasortat siulersuinerinermik suliaqartimik isumaginninnerinermut atasumik aningaasartuutaat, tassunga ilanngullugit angalanernut, najugaqarnerinermut nerisaqarnerinermullu aningaasartuutit. Aningaasartuutit taakkua amerlassusissaannut siulersuisunut ilaasortat ataasiakkaat sumi najugaqarnerat apeqqutaavoq. Aningaasartuutit 100-150.000 kr.-iunissaat naatsorsuutigineqartariaqarpoq, tassami aningaasarsianut 60.000 kr.-it missingersuusiorneqarmata, pissutigalugu siulittaasoq 30.000 kr.-inik siulersuisunilu ilaasortat allat tamarmik immikkut 7.500 kr.-inik aningaasarsiaqassasut ilimagineqarmat. Angalanernut il.il. aningaasartuutit taamaalillutik 40-90.000 kr.-inut missingersuusiorneqarput.

Ilutigisaanik isertitassat isernerinermi akiliutit isiginnaartitsinerinermillu tunisat amerlanerat pissutigalugu annertusinissaat missingersuusiorneqarpoq, ullumikkut 200.000 kr.-init qaffakkiartorlutik 2011-mi 800.000 kr.-iullutik, 2012-mi 900.000 kr.-iullutik 2013-imilu 1,0 mio. kr.-iullutik. Tapiissuteqartartunit allanit tapiisoqarnissaa naatsorsuutaanngilaq. Naalakkersuisut nalilerpaat aallartisarnerinermi aqqissuussinerinermut aamma angalalluni isiginnaartitsisarnerinermut suliniutinut pisariaqartunik aningaasaliisoqarnissaa qularnaartariaqartoq.

Isiginnaartitsisarartunngorniarluni ilinniakkamut atatillugu piffissap affaa isiginnaartitsisarartut atorfik missingersuusiorneqarpoq, siunnersuinerinermut ilinniartitsinerinermullu aamma ilinniakkap aqutarineranut piffissap affaa allaffissornikkut atorfimmut missingersuunneqarpoq. Qaavatigut aningaasartuuteqarfiussapput atortut, atisat, pinner-saait, isiginnaartitsiviup tunulequtai il.il., ilinniartunngortitsinerinermi aningaasartuutit, avataani init attartukkat, avataaniit ilinniartitsisut, isiginnaartitsilluni/paasisassarsiorluni/festivalinut peqataalluni angalanerit aamma isiginnaartitsisarfiup pisortaanut, teknikkimut ingerlatsinerinermullu malittaasumik aningaasartuutit.

Isiginnaartitsinerinermut isiginnaartitsinikkullu eqqumiitsuliornernut siunnersuummi matumani ullumikkutut marloqiusaasumik tapiiffigineqarnissaq periarfissaqassaaq, tassaasut Kalaallit Nunatta Isiginnaartitsisarfanut aningaasaliissutit aamma kulturimut aningaasaliissutit kiisalu tipsernermit lottornerinermillu isertitanit tapiissutit. Aammattaq Naalakkersuisut allatut isiginnaartitsinikkut ingerlassanut tapiissutaat, tak. § 14, allatut aalajangiisoqarnissaata tungaanut kontot pineqartut aqutigalugit aningaasalersorneqarallassapput.

Isiginnaartitsisartutut ilinniartitaanermik pilersitsinerup nassatarissavaa isiginnaartitsisartutut ilinniartitaaneq pillugu nalunaarusiortoqarnissaa, tassani ilaatigut ilinniartussanik ti-gooqqaaneq, atuartitsineq soraarummeersimanermullu uppersaasiisarneq pillugit malittarisasiortoqassalluni. Tamatuma saniatigut Ilinniartitaaneq pillugu siunnersuisoqatigiit katitigaanerat sulinerallu pillugu malittarisasiortoqassaaq. Tamatuma saniatigut Kalaallit Nunaata Isiginnaartitsisarfiani siulersuisut aningaasarsiaat aningaasartuutimillu taarsiivigineqarnissaat pillugit nalunaarut suliarineqassaaq. Aammattaaq isiginnaartitsisartutut ilinniartitaanermi ilinniarnermut aqqissuussineq Naalakkersuisunit akuerineqassaaq. Tamatuma malitsigisaanik aningaasartuuteqarnerunissaaq naatsorsuutigineqanngilaq. Aamma pisortanut allaffissornikkut kinguneqarnerussanngilaq.

5. Inuussutissarsiutinik ingerlataqartunut allaffissornikkut aningaasatigullu kinguniusussat:

Inuussutissarsiutinik ingerlataqartunut siunnersuut allaffissornikkut aningaasatigullu kinguneqassanngilaq.

6. Avatangiisinut pinngortitamullu kinguniusussat:

Avatangiisinut pinngortitamullu siunnersuut kinguneqassanngilaq.

7. Innuttaasunut allaffissornikkut (ingerlatsinermut) kinguniusussat:

Siunnersuut innuttaasunut allaffissornikkut (ingerlatsinermut) kinguneqassanngilaq.

8. Naalagaaffeqatigiinnermut tunngasut:

Siunnersuut Naalagaaffeqatigiinnermut sunniuteqassanngilaq.

9. Oqartussanut kattuffinnullu tusarniaaneq:

Inatsisartut inatsisissaannut siunnersuut piffissami 29. 01.2009-miit 20.02. 2009-mut tusarniaassutigalugu nassiusuunneqarsimavoq makkununnga:

Naalakkersuisut siulittaasuata Naalakkersuisoqarfia	Aningaasanut Nunanullu allanut Naalakkersuisoqarfik, maanna Aningaasanut Naalakkersuisoqarfiusoq Nunanullu allanut Pisortaqarfiusoq
Attaveqarnermut Avatangiisinullu Naalakkersuisoqarfik, maanna Nunamut namminermt, Pinngortitamut Avatangiisinullu Naalakkersuisoqarfiusoq kiisalu Ineqarnermut, Attaveqarnermut Angallanermullu Naalakkersuisoqarfiusoq	Ilaqutariinnermut Peqqissutsimullu Naalakkersuisoqarfik, maanna Isumaginninnermut Naalakkersuisoqarfiusoq Peqqissutsimullu Naalakkersuisoqarfiusoq
Inuussutissarsiortermt Suliffeqarnermullu Naalakkersuisoqarfik	Piniarnermt, Aalisarnermt Nunalerinermullu Naalakkersuisoqarfik, maanna Aalisarnermt, Piniarnermt Nunalerinermullu Naalakkersuisoqarfiusoq
Illuutinut Upalungaarsimanermullu Aqutsisoqarfik	KANUKOKA
Aningaasaqarnermt Sulisoqarnermullu Aqutsisoqarfik	Silamiut
Atuakkiortut Peqatigiiffiat	KIMIK
Katuaq	Assilissat
Taseralik	INNK
KNR	STTK
KAISKA	

Siunnersuut iluarsartuuteqqitaaq, tusarniaanermi akissutit ilanngullugit suliarisaaq, aningaasatigullu kingunerisaasussat itisilerneqarfigisaat 12. juli 2010-miit 19. juli 2010-mut Aningaasaqarnermut Naalackersuisoqarfimmut nutaamik tusarniaassutigineqarpoq.

Makkunangga tusarniaanermut akissutinik tigusaqartoqarpoq:
Aningaasanut Nunanullu allanut Naalackersuisoqarfik, Attaveqarnermut Avatangiisinullu Naalackersuisoqarfik, Ilaqutariinnermut Peqqissutsimullu Naalackersuisoqarfik, KANUKOKA, Silamiut, Taseralik, Katuaq aamma KAISKA.

Tusarniaanermut akissutigineqartut sapinngisamik siunnersuummut ilanngunneqarput.

Attaveqarnermut Avatangiisinullu Naalackersuisoqarfik aamma Ilaqutariinnermut Peqqissutsimullu Naalackersuisoqarfik siunnersuummut oqaaseqaateqanngillat.

Aningaasanut Naalackersuisoqarfik (AN) tusarniaanermut marlunnik akissuteqarpoq. Akissummi kingullermi aamma naalackersuisoqarfiup tusarniaanermut akissutimini siullermi maluginiagaanik ilanngussisoqarsimavoq. AN allappoq naalackersuisoqarfiup 2009-mi februaarimi tusarniaanermut akissutimini siullermi kaammattuutigigaa inatsisissatut siunnersuut Naalackersuisuni Inatsisartunilu suliarisassanngorlugu ingerlateqqinneqassanngitsoq, inatsisissatut siunnersuuttip aningaasaqarnikut sulii aningaasalersorneqarnissaannik paasisaqarfigineqanngitsunik kinguneqarnissaata naatsorsuutigineqarnera tunngavilersuutigalugu. Aningaasaqarnikkut kingunerisassat allaaserineqarnerini taaneqartutut aningaasalersuinissartaa maanna Naalackersuisut AIS 2011-mut siunnersuutaannut ilanngunneqarpoq. AN akissutimini kingullermi naggasiutigalugu allappoq naalackersuisoqarfik isumaqartoq inatsisissatut siunnersuut aningaasatigut naammattumik killiliussartalimmik suliarineqarsimasooq taamaattumillu KIIIN ukiumut aningaasanut inatsiseqarfiusumut 2011-mut ukiunullu missingersuusiortifiusunut aningaasaliissutinik qinnuteqaqqittariaqarani.

AN akissutimini kingullermi aamma isiginnaartitsisartutut ilinniartitaanermut, Kalaallit Nunaata Isiginnaartitsisarfiata illutaanut akissarsianullu aningaasartuutit qaffannissaannut tunngasunik apeq-quteqarpoq.

Isiginnaartitsisartutut ilinniartitaanermut tunngatillugu AN ima allappoq: *“Isiginnaartitsisartutut ilinniartitaanermik ukiunik marlunnik sivisussusilimmik Danmarkimi nunaniluunniit avannarlerni allani inuussutissarsiutaasinnaanngitsumik pilersitsinialersaartoqarpoq, tassami ilinniartitaaneq nunanit taakkunangga appasinnerussamat. AN isumaqarpoq tamanna isiginnaartitsisartutut ilinniartitaanerup nunanut allanut merititut nuunneqarsinnaanissaanik isumaliuteqarnermut ataqtigiinngissuteqartoq. Maanna nuussinissap periarfissaanissaa qularnaarneqarsimanerluni? Isiginnaartitsisartutut ilinniartitaanermik nunani allani atorineqarsinnaasumik pilersitsinissaa KIIIN-imit isumaliutigineqarnerluni, inuusuttut Kalaallit Nunaanni isiginnaartitsisartutut ilinniarusuttut sumiiffinni allani ilinniakkaminnik atuisinnaanngorlugit?*

AN-imit allaatigineqartunut ilisimatitsissutigineqassaaq isiginnaartitsisartutut ilinniartitaaneq isumaliutigineqartoq tamanna pillugu Silamiunit saqqummiussaq aallaavigalugu allaaserineqarmat. Qulaani aningaasaqarnikkut kingunerisassani allassimasutut Silamiut oqaatigaat maanna periarfissat atuartitsisussallu amigaataanerit pissutigalugu Nunani Avannarlerni ilinniartitaanerit matumunnga assingusut nalingalugit isiginnaartitsisartutut ilinniartitaanermik pilersitsinissaq piviusorsiortuunngitsoq. Aamma allassimavoq Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup piumasarisimagaa ilinniartitaanermi ilinniarnissamik aqqissuussi-neq sapinngisamik Kalaallit Nunaata avataani isiginnaartitsisartutut ilinniartitaanermut naleqqusarneqassasoq, taamaalilluni kalaallit isiginnaartitsisartunngorniartuusut nunani allani qaffasinnerusumik ilinniaqqikkumasut nuunneqarsinnaaniassammata. Aamma Aqutsisoqarfimmit nalunaarutigineqarpoq nunatsinni isiginnaartitsisartutut ilinniartitaaneq Namminersorlutik Oqartussat ilinniarti-

taanernut ilinniarsimasutut inuussutissarsiutinut ilinniartitaanertut ilinniagaqarnersiuteqarfigineqarsinnaasunut allattorsimaffiutaannut nalunaarsorneqassasoq. Isiginnaartitsisartutut ilinniartitaaneq maanna atugassarititaasut piviusorsioortuusut aallaavigalugit aaqqissuunneqarpoq nunani allani merititut nuussinissamut sapinngisamik periarfissaliisoqarluni. Tamatuma kingunerissavaa Kalaallit Nunaata Isiginnaartitsisarfianni isiginnaartitsisartutut ilinniarsimasut allami isiginnaartitsisartutut ilinniarnissaasa sivikillisanngortinneqarsinnaanerat. Ilinniartitaanerup meritinnngortinneqarsinnaanera ilinniarnermut aaqqissuussinermut Naalakkersuisunit akuerineqartussamut atatillugu pissaaq.

AN-imit aamma isiginnaartitsisartutut ilinniartitaanerup tunngatillugu oqaatigineqarpoq isiginnaartitsisartutut ilinniartitaanerup imarisaasa atuartitsisullu qassiussanerisa sunillu piginnaasaqarnissaasa nassuiarneqarnerat amigaatigineqartoq. Tamatumunnga atatillugu apeqqutigineqarpoq KIIIN-ip isumaliutigisimaneraa isiginnaartitsisartutut ilinniartitaanermi ilinniarfinit allanit ilisimalinnik atuisoqarsinnaasooq atuartitsisunullu akissarsianut aningaasartuutit missingersuutinut ilaatinneqarsimanersut. Tamatumunnga tunngatillugu ilisimatitsissutigineqassaaq aningaasaqarnikkut kingunerisassanik allaaserinninnermi allassimammatt siunnersioqatigiinnermut atuartitsinermullu ullup affaanut isiginnaartitsisartutut atorfinitsitsisoqarnissaa kiisalu ilinniartitaanerup aqunneqarnissaanut allaffissornermik sulialittut ullup affaanut atorfinitsitsisoqarnissaa missingersuutigineqartoq. Tamatuma saniatigut atortunut, isiginnaartitsinermi atisanut, kiinnamut qalipaatinut, isiginnaartitsiviup tunulequtaanut, il.il. aningaasartuuteqartoqassaaq, ilinniartoqalernermi aningaasartuuteqartoqassalluni, avataani ininik atuinermut aningaasartuuteqartoqassalluni, avataanit atuartitsisoqarnermut, angalaarluni isiginnaartitsiartornermut/paasisassarsiornermut/festivalinut peqataanermut aningaasartuuteqartoqassalluni, kiisalu isiginnaartitsisarfiup pisortaanut, teknikkimut ingerlatsinermullu malitsitut aningaasartuuteqartoqassalluni. Ilasutitut ilisimatitsissutigineqassaaq ilinniarfinit allanit atuartitsisunik atuinissaaq ajornassannginnersoq naapertuutissanersorlu misissussallugu Kalaallit Nunaata Isiginnaartitsisarfiata nammineq aalajangigassarimmagu. Silamiut saqqummiussaminni aamma allapput kalaallisut, tuluttut oqaluttuarisaanermilu atuartitsinermut tunngatillugu Nuummi neqeroorutinik allanik atuinissaaq ajornartinnagu tamanna pisassasoq. Tamatumunngali atatillugu oqaatigineqassaaq ilinniarfinit allanit atuartitsisunik atuneq tamatumunnga akiliinani pisinnaasutut naatsorsuutigineqarsinnaanngimmat. Akissarsianut aningaasartuutit missingersuutinut ilanngunneqarsimanersut apeqquteqartoqarmat tamanna taamaattutut akissuteqarfigineqarsinnaavoq. Isiginnaartitsisartutut ilinniartitaanerup imarisaasa allaaserineqarnerinut atatillugu ilisimatitsissutigineqarsinnaavoq saqqummiussami Silamiut suliarisaanni ilinniartitaaneq ukiunik marlunnik sivissusilik pineqarmat ukiut affakkuutaartunut sisamanut aaqqissuussaaq. Atuartitsineq sap.ak. 30-nik atuartitsinertalerlugu immikkoortukkuutaarluni atuartitsiviussaaq. Ilinniarnermut aaqqissuussineq faginik makkuninnga imaqtussatut naatsorsuutigineqarpoq: Kalaallisut, tuluttut, oqaluttuarisaneq, timikkut sungiusarneq, nipimik sungiusaneq, psykologi inuttullu ineriartorneq, erinarsorneq qitinnerlu, allattariarsornikkut paasinarsarneq takuneqarsinnaasumillu paasinarsarneq, teaterteknik piareersaqaaranilu saqqummiussineq, dramaturgi aamma storytelling isiginnaartitsisartunullu misilittagaqarneq.

AN Kalaallit Nunaata Isiginnaartitsisarfiata illutai pillugit allappoq illutanik 2013-imi naliliinermut atatillugu ingerlatanik annertusaanissamut aningaasaleeqqittoqarnissaa kissaatigineqassappat aningaasaqarnikkut aningaasartuutit nassuiaatigineqarnissaat qularnaarneqassasoq. Aamma apeqqutigineqarpoq ingerlatanik annertusaanermut aningaasartuutit missingersuusionermut ilanngunneqareersimanersooq. Tamatumunnga tunngatillugu ilisimatitsissutigineqassaaq illutat allannngortinneqarnissaannut suli isummertoqarsimannngimmat tamanna missingersuusioneraneqanngimmat. Naliliinermi illutat allannngortinneqartariaqassappata tamatumunnga atatillugu allatut aaqqiinissamut periarfissanik naliliisoqassaaq tamatumunngalu aningaasartuutit allaaserineqarlutik. AN aamma allappoq qanorluunniit pisoqaraluarpat maanna illutaasut aamma 2013-ip kingorna atuinneqarnissaannut pilersaaruteqartoqartariaqartoq, alliliinissamut akissaqartoqannginnissaa eqqarsaatigalugu, naliliineq qanorluunniit inerniliiviugaluarpat. Tamanna piimaarpoq.

AN nangippoq akissarsianut aningaasartuutit 1,3 mio. kr.-init ukiumut 5,5 mio. kr.-inut qaffanneqartarnissaat nassuiaatigineqartariaqartoq, tassami akissarsianut aningaasartuutininik qaffaanerummat annertoq. Tamatumunnga atatillugu apeqqutigineqarpoq akissarsianut aningaasartuutit 2011-mut ukiunullu missingersuusiorfiusunut missingersuutininut ilanngunneqarsimanersut. Tamanna pillugu ilisimatitsissutigineqassaaq aningaasaqarnikkut kingunerisassanik allaaserinninnermi allanneqarmat akissarsianut aningaasartuutininik qaffaanermi tassani isiginnaartitsisarfiup pisortaanik ulloq naallugu sulisartumik sulisorinniinnarnissaq, allaffimmut aqutsisumik atorfinitsitsinissaq kiisalu PR-Marketingmedarbejderimik ullup affaanut atorfiusunit marlunnit ulloq naallugu marlunnik atorfinngortitsineq, lysteknikerip ulloq naallugu sulisoriinnarneqarnissaa, ulloq naallugu lydteknikereqalernissaq, teaterkonsulentimik ulloq naallugu sulisoqalernissaq ullup affaani isiginnaartitsisartutut atorfiup ulloq naallugu atorfinnut sisamanngortinneqarnissaa, ilinniartitaanermut akisussaasuusumik ullup affaanut atorfinitsitsinissaq tamatumalu saniatigut suliniummik suliaqartussanik atorfinitsitsinissaq ilaatinneqarmata. Kingulliit taaneqartut tassaasinnaapput dramatikertit, instruktørit, rekvisitørit, mersortartut, koreografit, nipilersortartut, teatersnedkerit, saffiut, isiginnaartitsisarfinnik qalipaasut, scenografit, sminkørit il.il. Aammattaaq allassimavoq aningaasaliissutinik qaffaaneq Kalaallit Nunaata Isiginnaartitsisarfiata, tassunga ilanngullugu isiginnaartitsisartutut ilinniartitaanerup ingerlanneqarneranut aningaasaliissutit nunap isiginnaartitsisarfiata tunngaviusumik ingerlatsinnermut aningaasaqarnikkut tunngaveqarnissaanik aallaaveqarneranik tunngavilersuuserneqartoq. Tassa ilaatigut imaappoq eqqortunik piginnaasalinnik sulisoqartariaqarpoq, ininut aningaasartuuteqartussaavoq, soorlu angalaarluni isiginnaartitsiartornernut isiginnaartitsissutissanik iluarsaanermut suliniutinut kiisalu isiginnaartitsisartutut ilinniartitaanermi ilinniartunut tunngatillugu suliaassanik isumaginninnermut aningaasassaqartoqartussaalluni. Naggasiutigalugu uppersarnerneqassaaq akissarsianut aningaasartuutit 2011-imut ukiunullu missingersuusiorfiusunut missingersuusiornermi ilaatinneqarmata.

KANUKOKA inatsisissatut siunnersuummut oqaaseqaateqanngilaq allallunili kommuninit akissuteqartoqannginneranut pissutaasoq tusarniaassutigineqartup taama piffissakitsigaluni politikikkut suliarineqarnissaanut periarfissaqanngitsoq. Tamatuma kingorna Kommuneqarfik Sermersuumit tusarniaanermut akissummik tigusaqartoqarpoq.

Kommuneqarfik Sermersooq aallarniutitit allappoq tusarniaanermut akissutit imaat Kommuneqarfik Sermersuumi Piorsaanermut Ataatsimiititaliamut saqqummiunneqarsimasut piffissaaleqinerli pissutigalugu allakkiatq atorfilittanit attuumassutilinnit suliarineqarsimasoq, isumartik naapertorlugu kommunimut pitsaasussamut ataqatigiisillugu. Kommune aamma allappoq inatsisissatut siunnersuut pitsaarpassitsoq pitsaasumillu siunertaqarfiulluni. Kommunimit uparuarneqarpoq siunertamut aningaasaliunniarneqartut Namminersorlutik Oqartussanit minnaarlugit missingersuusiorneqarsimarpassittut. Tamanna pillugu oqartoqarpoq aningaasaateqarfinnut kommuninullu il.il. qinnuteqaqattaarnissami nukippassuit atorneqarnissaat Kalaallit Nunaata Isiginnaartitsisarfiata anersaavanut naapertuuttutut isigineqarsinnaanngitsoq. Tamatuma saniatigut oqaatigineqarpoq Kalaallit Nunaata Isiginnaartitsisarfiata isiginnaartitsisarnera sapinngisamik najugaqarfinnut amerlanerpaanut iluaqutaasariaqartoq. Naalakkersuisut tamatumunnga oqaatigissavaat missingersuusiat maannamut misilitakkat tunuliaqutaralugit suliarineqarmata Kalaallit Nunaatalu Isiginnaartitsisarfia angalalluni isiginnaartitsiartortarnissamik pisussaaffilerneqarmat.

Tamatuma saniatigut Kommuneqarfik Sermersooq allappoq piffissami siulersuisut qinigaaffissaanni inatsisartut qinigaaffiata kommunimiluunniit qinigaaffiup malinneqarnissaa erseqqissarneqartariaqartoq. Siunnersuummi piffissaq qinigaaffiuseq taakkununnga atatinneqanngilaq taamaattumillu toqqaaneq inatsisip 1. januar 2011-mi atuutilernerani ukiunut siullernut sisamanut pissalluni, qaammatisiutit ukiuannik malinniffiusunut.

Tamatuma saniatigut Kommuneqarfik Sermersooq allappoq siulersuisut isiginnaartitsisarfiup pisortaanik atorfinitsitsinnermut piffissaliinissamik aalajangersaasuusariaqartut. Tamatumunnga Naalak-

kersuisut oqaatigissavaat atorfeqarnerup ukiunut sisamanut inatsimmi aalajangersarneqarnissaa naapertuussorineqarmat taamaalilluni isiginnaartitsisarfiup pisortaanut angusassatut piumasaqaate-qartoqarsinnaalissammat ingerlalluarnissarlu qularnaarneqarluni.

Tamatuma saniatigut Kommuneqarfik Sermersuumit kaammattuutigineqarpoq siulersuisut sulisunik atorfinitsitsisuullutillu soraarsitsisartuussasut. Naalakkersuisut isumaqarput isiginnaartitsisarfiup pisortaata aqutsinnaatitaanerata ilagigaa sulisunik atorfinitsitsinnaaneq soraarsitsisinnaanerlu.

Kommuneqarfik Sermersooq tamatuma saniatigut allappoq meeqqat atuarfianni atuartut isiginnaartitsisarfimmi praktikersinnaanissaat kissaatiginartoq. Tamanna inatsisissatut siunnersuummi akornutissaqartinneqanngilaq.

Kiisalu Kommuneqarfik Sermersooq allappoq atuartut ingerlaqqissinnaanissaat isiginnaartitsiner-mik ilinniarfinnut qularnaarneqassasoq. Naalakkersuisut tamatumunnga oqaatigissavaat Kalaallit Nunaanni Isiginnaartitsisarfiup suliassarissammagu isiginnaartitsisartussanik ilinniartitsinerup ima aaqqissuunnissaa ilinniartut nunani allani isiginnaartitsisartut ilinniarfiini ilinnialissagunik sapinngi-samik annertunerpaamik piffissamik ilinniarfimminnik sivikillisaanneqarsinnaanngorlugit.

KAISKA-mit kaammattuutigineqarpoq Kalaallit Nunaata Isiginnaartitsisarfiata ukiunut arlalinnut atuuttumik ilinniartoqartarnissamik aaqqissuussineq aqutugalugu isiginnaartitsisartunik ilinniartit-sinissamik aalajangersagaq aamma ”sulisunik isiginnaartitsisarfimmu attuumassuteqartunik” ilane-qassasoq. Kaammattuut tunngavilersorneqarsimangilaq. Naalakkersuisut tamatumunnga oqaatigis-savaat Kalaallit Nunaata Isiginnaartitsisarfiata isiginnaartitsisartunik ilinniartitsinissamik aaqqis-suussineq aqutugalugu isiginnaartitsisartut ilinniartitsinissamik pisussaaffilerneqarnissaa siuner-taasimasoq, nukissaqarniarnermullu tunngasut pissutigalugit aamma sulisut allat pillugit ilinniartit-siner-mik imaluunniit ilinniartoqartarnissamik aaqqissuussinissamut isiginnaartitsisarfiup pisussaaf-ilerneqarnissaa naapertuussorineqarsimangitsoq.

Tamatuma saniatigut KAISKA-mit malugeqquneqarpoq ilinniartoqartarnissamik aaqqissuussinissa-tut siunnersuutigineqartoq Eqqumiitsuliornermik Ilinniarfimmi ilinniartoqartarnermut aaqqissuussi-nermut assersuunneqarsinnaanngitsoq, tassami siunnersuummut nassuiaatini allassimammat ilin-niartoqartarnissamik aaqqissuussineq Eqqumiitsuliornermik Ilinniarfimmi ilinniartoqartarnermut aaqqissuussinermut assersuunneqarsinnaasoq. KAISKA-mit malugeqquneqarpoq Eqqumiitsulior-nermik Ilinniarfimmi ilinniartoqartarnissamik aaqqissuussineq atuartitsinerummat ukiumillu ataa-siinnarmik sivisussuseqarluni. Naalakkersuisut tusarniaareernerup kingorna siunertamut naapertuut-tutut isigaat ilinniartitsiner-mik aaqqissuussinerup ilinniagavittut aaqqissuunnissaa. Tamanna pillugu nalinginnaasumik nassuiaatit innersuussutigineqarput.

Silamiut tusarniaanermut akissutimini aallarniutigalugu malugeqquaa isiginnaartitsisarfiup siuler-suisuisa siunnersuutip pileriartornera malinnaaffigeqqissaarsimagaat isiginnaartitsisarfiup pisortaata suleqatigiissitani peqataaneratigut sorpassuarnut isummernissaq sunniinissarlu periarfissaqarfusi-malluni. Tamatumunnga nangissutitut oqaatigineqarpoq Silamiut siunnersuummut maanna taamatut isikkoqartillugu isumaqataalluinnartut, tassunga ilanngullugu suliffeqarfimmik imminut ingerlattu-mik Silamiunik taamaatitsinissaq.

Silamiut nangipput siunnersuummut oqaaseqaatiminni nalorninartut, tassunga ilanngullugu oqaatsit soorlu ingerlatsiner-mut tapersiissutit, ingerlatsiner-mut tapiissutit tunisassiornermullu tapiissutit as-sigiilluanngitsumik atorneqarnerisa peerneqarnissaat siunertarigitsik. Taakku pillugit Silamiut kaammattuutaat siunnersuummut ilanngunneqarput.

Silamiut ilinniartoqartarnissatut siunnersuutigineqartumut tunngatillugu allapput Silamiut aamma naalakkersuisoqarfik peqatigalugu piareersaaner-ni anguniagariuarsimagaat Kalaallit Nunaanni isi-

ginnaartitsisartutut ilinniarfivimmik ukiunik pingasunik sivilissusilimmik ilinniarfiusartussamik pilersitsinissaq, taannarpiarmi atorfissaqartinneqarmat, ilinniartoqartarneq minnerusumik pisussaaf-feqarfiusoq pinnagu. Tamatuma kingunerisaanik siunnersuummi § 11, imm. 1-imut nassuiaatit allanngortinneqarnissaat Silamiut kaammattuutigaat. Allatut oqaasertaliinissamut siunnersuut imaappoq: *”Aalajangersakkami matumani Kalaallit Nunaata Isiginnaartitsisarfia isiginnaartitsisartunik ilinniartitsisarnissaq siunertaralugu ukiunut arlalinnut atuuttumik ilinniartoqartarnermik pilersitsinissamut pisussaaffilerneqarpoq. Ilinniartoqartarneq isiginnaartitsisarfirmik Kalaallit Nunaata avataaniittumik suleqateqarluni isiginnaartitsisartutut ilinniartitaanivimmut alloriarnertut siullertut isumaliutigineqarpoq. Ilinniartoqartarnikkut ilinniartut nittarsaanermikkut isiginnaartitsisartutut ilinniagavimmik naamassinninnissamut imaluunniit inuussutissarsiutigalugu isiginnaartitsisartutut akuerisaanissamut tunngaviummik pisinnaasaqalersinneqassapput”*. Naalakkersuisut tamatumunnga oqaatigissavaat maanna siunnersuutaasoq malillugu Kalaallit Nunaata Isiginnaartitsisarfia pisussaaffilerneqarmat isiginnaartitsisartutut ilinniartitsinermik pilersitsinissamut. Ilinniagaq naatsorsuutigineqarpoq ukiunik marlunnik sivilissususeqassasoq, Kalaallit Nunaannilu inuutissarsiutigalugu ingerlatsinissamut pisinnaatitsilissalluni, suliamik ilinniagaqarsimasutut killiffik ataallugu inissisimalluni inuutissarsiummik ilinniagaalluni ilinniagaqarnerfiaqarsinnaasoq. Ilimagineqann-gilaq ilinniagaq toqqaannartumik Danmarkimi Nunanilu Avannarlerni inuutissarsiutitut ingerlatsinissamut pisinnaatitsilissasoq, nunani taakkunani isiginnaartitsisartunngorniarluni ilinniakkanit appasinnerusumik killiffeqartussaagami. Kalaallit Nunaata Isiginnaartitsisarfia peqquneqassaaq ilinniakkap aaqqissugaanera ima allaasereqqullugu, ilinniagaq sapinngisamik annertunerpaamik Kalaallit Nunaata avataani isiginnaartitsisartutut ilinniakkanut naapertuuttunngorlugu, tassuunakkut Kalaallit Nunaanni isiginnaartitsisartutut ilinniarsimasut nunani allani qaffasinnerusumik ilinniarumasut ilinniaqqinnermik ilaanik sivikillisaanneqarsinnaaqqullugit. Aammattaaq nalinginnaasumik nassuiaatit innersuussutigineqarput.

Silamiut aamma § 11. Imm. 1-imut nassuiaatissatut ima siunnersuuteqarput: *”Isiginnaartitsisartutut ilinniarfimmik peqataasut ilinniartut allat assigalugit ilinniagaqarnerfiuteqartinneqarnissamik ilinniartunullu ineqartinneqarnissamik pisariaqartitsissapput. Isiginnaartitsisarfirmik sulisunut, taakkununnga ilanngullugit ilinniartitsisunut inissaqartitsinissaq ilinniartoqartarnissamut isiginnaartitsisartutullu ilinniarfeqarnissamut pisariaqarpoq – aamma isiginnaartitsisarfiup nalinginnaasumik ingerlanneqarneranut. Kalaallit Nunaanni Isiginnaartitsisarfik isiginnaartitsisartunut inissiaateqartinneqartariaqarpoq sulianullu aalajangersimasunut avataanit tikisinneqartunut allanut kiisalu utaqqiisaasumik inissaqartitsisinnaatinneqartariaqarluni”*. Naalakkersuisut tamatumunnga oqaatigissavaat ilinniartut ilinniakkamut akuerisaasut ilinniartut allat assigalugit, ilinniagaqarnerfiaqarsinnaatitaassammata ilinniartunullu inissianiissinnaatitaallutik. Initaarniarnermut normunik tunniussinissamut utaqqiisaasumillu inissaqartitsinermut tunngatillugu Naalakkersuisut tamatumunnga qularnaarinissamut periarfissaqannngillat.

Taseralimmit kaammattuutigineqarpoq pisortat suliffeqarfiutaat imminut ingerlattoq taanna qanoq suleriaaseqassanersoq erseqqissaqqullugu, tamatumani oqaatigineqarluni tamanna siunissami aningaasaliisussanut qinnuteqarnernut pingaaruteqarsinnaasoq, tassami aningaasaateqarfiit arlallit pisortat suliffeqarfiutaannut tapiissuteqarneq ajormata. Katuaq taamatupajaaq oqaaseqarpoq. Tamanna Naalakkersuisut nassuiaatini erseqqissarniarsimavaat.

Tamatuma saniatigut Taseralimmit kaammattuutigineqarpoq siulersuisuni sulisut sinniisuutitaqartinneqassanngitsut. Tamanna ilaatigut sulisut amerlanersaasa sulianut attuumassutilinnik suliaqartuusarnerannik tunngavilersorneqarpoq. Tamatumunnga Naalakkersuisut oqaatigissavaat aalajangersimasunik sulisoqassammat siulersuisullu sulinissaannut naapertuussorineqarluni sulisut siulersuisunut sinniisussaminnik inassuteqarnissaat.

Tamatuma saniatigut sulisunik siulersuisuni sinniisuutitaqartarnissamut tunngatillugu Taseralimmit oqaatigineqarpoq aqutsinikkut ajornartorsiutinik nassataqarsinnaasoq, tassami aamma siulersuisuni

sulisut sinniisaasa pisortallu akornanni suliassanik akisussaaffinnillu agguataarineq pillugu siulersuisunut attuumassuteqanngitsunik piginnaatitaaneq pillugu ajornartorsiuteqartoqalersinnaammat. Naalackersuisut isumaqarput taamatut isumaqatigiinninnerit siulersuisut sulinerannut peqataanisamat siunertanik piumasaqaatinillu erseqqissaanikkut peerneqarsinnaasut, isumaqarlutillu taamatut isumaqatigiinnigissinnaanikkut siulersuisuni inummik sulisunit inassutigineqartumik naapertuuttumik sinniisoqarnissaq akornutissaqartinneqartariaqanngitsoq. Tamatuma saniatigut Taseralimmit allatut periarfissanik siunnersuuteqartoqarpoq oqaatigalugulu kikkut taasisinnaatitaanerisa paasi-niarneqarnissaa ajornartorsiutaasinnaasq. Tamatuma kingunerisaanik Naalackersuisut aalajangersakkamik erseqqissaapput, taamaalilluni allassimalersillugu inuk sulisunit inassutigineqartoq isiginnaartitsisarfirmi sulisut akornanni aalajangersimasumik sulisuusunit qinerneqassasoq.

Aamma Taseralimmit kaammattuutigineqarpoq Naalackersuisut namminneq siulersuisuni toqqaannartumik sinniisuutitaqarnissap naapertuunneranik naliliissasut. Naalackersuisut isumaqarput isiginnaartitsisarfiup politikikkut attuumassuteqannginnissaata qularnaarneqarnissaanik kissaateqarnermut Naalackersuisut siulersuisunut toqqaannartumik ilaasortaaitaqannginnissaat naapertuuttoq.

Tamatuma saniatigut Taseralimmit kaammattuutigineqarpoq Naalackersuisut naliliissasut kattuffik suli pilersinneqanngitsoq (piumassutsimik isiginnaartitsisartut kattuffiat) siulersuisuni inissaqartinneqassannginnersoq. Oqaatigineqarpoq kalaallit nunaanni isiginnaartitsisarfirmut pitsaanerussagunartoq suleqataasinnaasup siulersuisuni sinniisoqarnissaa. Tamatumani pineqarsinnaapput kulturikkut illorsuaq, angalatitseqatigiiffik atuisartulluunniit. Naalackersuisut tamatumunnga oqaatigisinnaavaat piumassutsiminnik isiginnaartitsisartut siulersuisuni sinniisoqarnissaat pingaartinneqarnerusoq tamannalu aamma naak taakku kattuffeqanngikkaluarpataluunniit pisinnaasq.

Kiisalu Taseralimmit Katuamiillu Kalaallit Nunaata Isiginnaartitsisarfianut illutassat pilugit oqaaseqartoqarpoq, taamaattorli siunnersuummut toqqaannartumik attuumassuteqanngitsunik. Oqaaseqaattit taakku Naalackersuisut tusaatissatut tiguaat.

Katuamit kaammattuutigineqarpoq siulersuisunut ilaasortaqaq ataaseq siulittaasumit siulersuisuniilluunniit inassutigineqassasoq. Tamatumunnga tunngavilersuutitut allassimavoq: ”Siulersuisunut ilaasortat aqutsinikkut ilisimasaqarnissaannik kiisalu suliffeqarfimmik aningaasaqarnikkut ingerlatsinermik tunngaviusumik ilisimasaqarnissaannik piumasaqaateqartoqarnera pitsaasuvoq, siulersuisulli katitigaaneri tamatiguunngitsoq siulersuisut katitigaanerat immikkut piginnaanilimmik inissaqartitsiviuneq ajorput siulersuisunut pisariaqartinneqangaarsinnaagaluartumik. Matumani aningaasaqarneq, inatsisilerineq ilisimasalluunniit siunnersorteqarnikkut pissarsiarineqarsinnaasut eqqarsaatigineqannginnerupput, suliatigulli immikkut, periutsikkut aqutsinikkulluunniit ilisimasassat pineqarlutik.” Naalackersuisut tamatumunnga oqaatigissavaat ilaasortamik siulittaasumit siulersuisuniilluunniit toqqaarneqartumik ilaasortaqaqarnissaq naapertuussorineqanngimmat. Siunertat Katuamit siunnersuutigineqartumut tunngaviusut siunnersuutigineqartutut toqqaasarnikkut isumagineqarsinnaapput, siulersuisut ataatsimoorlutik aqutsinermik ilisimasaqartussaammata.

Aalajangersakkanut ataasiakkaanut nassuiaatit

§ 1-imut

Aalajangersakkakkut Inatsisartut inatsisaata siunertaa pingasoqiusaasoq erseqqissarneqarpoq: 1) inuutissarsiutigalugu isiginnaartitsinikkut eqqumiitsuliortarnerup inatsisitigut killiliussivigineqarne-rata isumannaarneqarnissaa, 2) isiginnaartitsinikkut eqqumiitsuliornermi kulturip siuarsarnissaa aamma 3) inuussutissarsiutigalugu namminerlu kajuminnikkut isiginnaartitsisarnermik ingerlata-qarnerup nuna tamakkerlugu siuarsarlugulu ineriartortinnissaa.

Siunnersuutip suliarineqarneranut atatillugu pingaartuusimavoq siunertap nunamut tamarmut atuut-tussanngorlugu oqaasertalerneqarnissaa, tamannalu annermik siunertat pingajuanni erseqqissarne-qarpoq.

Inuussutissarsiutigalugu isiginnaartitsinikkut eqqumiitsuliornerup inatsisitigut killiliussivigineqar-nissaata isumannaarneqarnissaa siunnersuutip siunertaanut ilaatinneqarpoq, sulianik ilaatigut Sila-miut isumagisaannik paasinninnerup nassatarisaanik. Kalaallit Nunaanni inuutissarsiutigalugu isi-ginnaartitsinikkut eqqumiitsuliorneq pioreerpoq, ilaatigut kalaallit isiginnaartitsinikkut eqqumiitsu-liortut, kalaallit isiginnaagassiaat imaluunniit kalaallisut saqqummiinerit aqutigalugit. Kalaallinut tunngasortaa pingaaruteqarpoq isiginnaartitsisarnermi kulturiinnaanngitsumut aammali kalaal-lit kulturiannut, kisianni siunertamut naapertuuttuosorineqanngilaq piumasarissallugu, inatsisip ka-laallit immikkut isiginnaartitsinikkut eqqumiitsulioriaasiata aallunnissaa qularnaassagaa. Taamaat-toq siunnersuummi § 8-mi aalajangersarneqarpoq, Kalaallit Nunaata Isiginnaartitsisarfiata sulinera aallaavittut kallit kulturianni ileqquinilu tunngaveqassasoq.

Oqaatsip ”inuussutissarsiutigalugu” atorneqarnera pillugu § 2, imm. 2-mut nassuiaatit innersuussu-tigineqarput.

Isiginnaartitsisarnermi kulturip siuarsarnissaanik siunertap aallaavigaa isiginnaartitsinikkut eqqu-miitsuliorneq isiginnaartitsisarfillu isiginnaartunut saqqummiunneqartussaananerit, taamaammat siunnersuutip siunertaanut ilaavoq innuttaasut tamarmik isiginnaartitsisarfirmik isiginnartitsinik-kullu eqqumiitsuliornermik piumasaqarnerisa siuarsarnissaat. Isiginnaartitsisarnermi kulturip siuar-sarneqarnissaa neqeroorutitigut isumannaarneqassaaq. Taamaattumik neqeroorutit nunamut tamar-mut atuutissapput inuiaqatigiinnilu ukioqqortussutsinut assigiinngitsunut naleqqussagaassallutik.

Inuussutissarsiutigalugu namminerlu kajuminnikkut isiginnaartitsinikkut eqqumiitsuliornerup nuna tamakkerlugu siuarsarlugulu ineriartortinnissaannik siunertat ilaata pingajuanni ersersinneqarpoq isiginnaartitsinikkut eqqumiitsuliorneq inuussutissarsiutigalugu ingerlanneqaannarani aammali in-gerlanneqarmat nammineq kajuminnikkut isiginnaartitsisarfinnit namminerlu piumassutsimikkut sulisunit, sumiiffinni ataasiakkaani inuiaqatigiinni isiginnaartitsinikkut eqqumiitsuliorneq pillugu nersortarialimmik suliaqartunit. Inuussutissarsiutigalugu namminerlu kajuminnermik ingelata-qartut sulinermi pitsaanerusunik atugassaqartariaqarput. Oqaatsit ”nammineq kajuminnikkut” pillugu § 2, imm. 3-mut nassuiaatit innersuussutigineqassapput.

§ 2-mut

Imm. 1

Aalajangersakkami ”Isiginnaartitsinikkut eqqumiitsuliornerup” nassuiaataa aalajangiunneqarpoq. Aalajangiunneqarpoq isiginnaartitsinikkut eqqumiitsuliornermut ilaasut eqqumiitsuliornermik isig-innaartitsinerit suulluunniit. Assersuutigalugu tassaasinnaapput qangatut isiginnaartitsinerit, operat balletilu, kisiannili aamma tassaasinnaallutik assersuutigalugu qilaatersornerit uajeernerillu allallu

takutitsinerit kulturimik aallaaveqartut. Isiginnaartitsinikkut eqqumiitsuliornerup taama annertutigisumik nassuiaaserneranut tunuliaqutaavoq isiginnaartitsinikkut eqqumiitsuliornerup iluani suliniutitut nutaanut periarfissiinnissaq, taakkununga ilaallutik meeqqanut isiginnaartitsinerit, inuusanik inuttaliilluni isiginnaartitsinerit aamma misileraalluni isiginnaartitsinerit, taakku inuussutissarsiutigalugu namminerluunniit kajuminnikkut ingerlatsisunit piliaagaluarpata. Tamatuma nassataraa isiginnaartitsinikkut eqqumiitsuliornerup, isiginnaartut suliamillu ilisimasalittut isumalluutaasut kissaataat isiginnaartitsinerimik eqqumiitsuliornermik ilusilersueqataasinnaammata.

Imm. 2

Aalajangersakkakkut ”inuussutissarsiutigalugu” qanoq paasineqarnissaa erseqqissarneqarpoq. Malugeqquneqarpoq nassuiaat marloqiusaammat, tassami inuussutissarsiutiginninneq anguneqarsinnaammata ilinniartitaanikkut aamma nammineq peqataanikkut. Nammineq peqataanikkut inuussutissarsiutigalugu isiginnaartitsisartuuneq anguneqarsinnaavoq ukiuni arlaqartuni peqataanikkut, peqataaneq qaffasissumik eqqumiitsulioriaaseqarluni ingerlanneqarsimassaaq, pineqartullu peqataanera isiginnaartitsisarnermik ingerlassaqartut akornanni akuerisaasariaqarluni. Inuussutissarsiutiginninerup nassuiaataanut peqataasimanissap ilanngunneranut pissutaavoq nunami maani maannamut isiginnaartitsisartussanik ilinniartitsivinneq ingerlanneqanngimmat, naak inuit arlaqaqisut, isiginnaartitsisartut ilanngullugit, peqataanermikkut misilittakkatillu aqputtigalugit inuussutissarsiutigalugu ingerlatsisunngorsimagaluartut.

Ilanngullugu oqaatigineqassaaq isiginnaartitsisartuq aamma isiginnaartitsinikkut eqqumiitsulioruq alla immikkoortinneqarmata. Naalakkersuisut isumaqarput inuussutissarsiutigalugu aamma nammineq kajuminnikkut isiginnaartitsisartut immikkoortinnerat isiginnaartitsinerup iluani pingaarnepaallunilu naapertuunnerpaasoq, taamaammallu isiginnaartitsisartut immikkut taaneqarput. Aalajangersakkamili isiginnaartitsinikkut eqqumiitsuliornerit allat ilaatinneqarput, tak. imm. 1-imi isiginnaartitsinikkut eqqumiitsuliornerup nassuiaataa annertoq.

Inuussutissarsiutigalugu isiginnaartitsisartup aamma nammineq kajuminnikkut isiginnaartitsisartup akornanni immikkoortitsinerimut apeqqutaanngillat, isiginnaartitsisartup imaluunniit isiginnaartitsinikkut eqqumiitsuliornerup isiginnaartitsineriminni imaluunniit isiginnaartitsinikkut eqqumiitsuliorneriminni aningaasarsiorerat imaluunniit isiginnaartitsisarfimmi isiginnaartitsinikkulluunniit eqqumiitsuliornerminnut atatillugu atorfeqarnerat. Inuussutissarsiutigalugu aamma nammineq kajuminnikkut isiginnaartitsisartut akornanni immikkoortitsinerimik tunngavissatuaapput ilinniarsimaneq imaluunniit ukiuni arlaqartuni qaffasissumik eqqumiitsulioriaaseqarluni nammineq peqataasimaneq.

Imm. 3

Aalajangersakkami ”nammineq kajuminnikkut” qanoq paasineqassanersoq erseqqissarneqarpoq. Nammineq kajuminnikkut ingerlatsisoq sunngiffimmini isiginnaartitsinikkut eqqumiitsuliornermik ingerlataqartuavoq. Tassani pineqartuq tassaavoq isiginnaartitsinikkut eqqumiitsuliorneq tassaaneersoq pineqartup sunngiffimmi sammisatut sukisaarsaatitulluunniit ingerlassaa.

§ 3-mut

Aalajangersakkami aalajangersarneqarpoq Kalaallit Nunaata Isiginnaartitsisarfia tassaasoq pisortat suliffeqarfiutaat nammineertoq. Taamatut aqqiineq KNR-ip aqqiivigineqarsimaneratut aamma tunngavissumik ilinniartinnut aqqiussuinikkut inissisimanertut pissuseqarpoq.

Suliffeqarfiup pisortat suliffeqarfiutaattut inissinneranut pingaarnertut pissutaavoq, suliffeqarfiup ingerlannerata annertunersaa pisortanit aningaasalersorneqarmat, tak. siunnersuummi § 10, imm. 1. Tamatumalu saniatigut suliffeqarfik siunnersuummi § 10, imm. 3 tunngavigalugu Namminersorlu-

tik Oqartussani missingersuusiornermi, naatsorsuuserinermi aningaasartuutinillu nalunaaruteqartus-
saanermi aalajangersakkat atuuttut tamatigut malittussaammatigit.

Peqatigitillugu suliffeqarfimmik namminersortumik eqqartuineq isumaqarpoq, suliffeqarfik sumul-
luunniit pituttorsimanngitsoq, tamannalu erseqqissarneqarpoq suliffeqarfiup siulersuisoqarneratigit.
Namminersorlutik Oqartussat suliffeqarfiup ingerlanneqarneranut sunniuteqarsinnaanerata taamaalil-
luni tassaannaavoq inassuteqarneq aallaavigalugu siulersuisuni ilaasortassamik toqqaasinnaaneq,
takuuk siunnersuummi § 4, imm. 2.

Aalajangersakkap sunniutigaa Kalaallit Nunaata Isiginnaartitsisarfiata ingerlanneranut Aningaasa-
nut Inatsisikkut aningaasaliisoqartassamat, ullumikkut konto pingaarneq 40.15.03, Isiginnaartit-
sineq aqutugalugu tapiissutitut aningaasaliisoqartarunnaarluni. Aningaasanut inatsisikkut aningaa-
saliissutit Nunatta Isiginnaartitsisarfiata ingerlanneqarnera tamaat matussusertassavaat, tassalu isi-
ginnaagassianik aaqqissuinerit suliniutillu allat, pingaarnermik suliakkiissutigineqartut, tak. § 10.
Kisiannili naatsorsuutigineqarpoq isiginnaagassiorneq sapinngisamik avataaniit aningaasaleeqataa-
sussarsiuunneqartassasoq. Isiginnaartitsisarartunngornianik ilinniartitsinerup - Kalaallit Nunaata isi-
ginnaartitsisarfiarit isumagineqartussap - aningaasalersornera, siunnersuutip aningaasaqarnikkut
allaffissornikkullu kinguneriumaagaanik eqqaaneqartutut, pissaaq konto pingaarneq 40.11.61, Ilin-
niartitaanermut sillimmatit aqutugalugu.

§ 4-mut

Imm. 1

Aalajangersarneqarpoq siulersuisut ataatsimoorlutik isiginnaartitsinermik ingerlataqarnermik anner-
tuumik ilisimasaqartuussasut aqutsinermillu paasisimasaqarluartuussasut. Siulersuisut ataatsimoor-
lutik isiginnaartitsinermik ingerlataqarnermik annertuumik ilisimasaqartuunissaannik aqutsinermillu
paasisimasaqarluartuunissaannik oqaasertaliinikkut, isiginnaartitsinermik ingerlataqarner-
mik/pilersitsisinnaassuseqarnermik aamma aqutsinermik niuernermillu paasisimasaqarluarnermik
piginnaasaqarnissat oqimaatigiiseriarneqarput. Oqaasertaliorneq ima isumaqarpoq, ilaasortat ataa-
siakkaat isiginnaartitsinermik ingerlataqarnermut siulersuinermilluunniit paasisimasaqarnissaat an-
nertuumik ilisimasaqarnissaat pisariaqanngitsoq. Oqartussaasutut toqqaasartut, Naalackersuisut,
tassaapput siulersuisut immikkoortortatut piginnaasanik taakkunannga pigisaqarnissaannik qulak-
keerisussat.

Imm. 2

Aalajangersakkakkut erseqqissarneqarpoq KAISKA-p, KANUKOKA-p, Kalaallit Atuakkiortut,
kajuminnikkut isiginnaartitsisartut kattuffiata aamma Kalaallit Nunaata Isiginnaartitsisarfiata suli-
suisa inassuteqarnerisigit siulersuisunik tallimanik ilaasortalimmik Naalackersuisut toqqaasinnaa-
sut.

Inassuteqaateqarsinnaasut aalajangersarneqarneranni pingaartinneqarpoq isiginnaartitsisarnermik
ingerlatsinermi soqutigisallit pingaarnertit ilaatinneqarnissaat.

Naalackersuisut toqqaanermut atatillugu inassuteqaatigineqartussatut pisinnaatitaasut inunnik amer-
lanerusunik inassuteqaateqaqqullugit qinnuigisinnaavaat, ajornanngippat pingaarnersiulluni tulle-
riiarlugit. Tamanna ima paasineqassaaq, Naalackersuisut toqqaanermi siulersuisut immikkoor-
tutut isiginnaartitsinermik ingerlataqarnermut paasisimasaqarnissaat siulersuinermillu ilisimasaqar-
nermik pigisaqarnerat qulakkiissammassuk. Naalackersuisut taamatut pissuteqartumik inassuteqaa-
tigineqartussatut pisinnaatitaasut aammattaq taakkua sapinngisamik inummik inunnilluunniit
amerlanerusunik inassuteqaateqaqqullugit qinnuigisinnaassavaat, siulersuisunik isiginnaartitsiner-
mik ingerlataqarnermut paasisimasaannik siulersuinermilluunniit ilisimasaannik ikiorsiisinnasus-

sanik. Naalakkersuisut taamaattumik inassutigineqartut tunngavilersorluagaanissaat aammattaaq qinnutigisinnaavaat.

Naalakkersuisut inassutigineqartut akornanni toqqaanissartik pisussaaffigissavaat. Naalakkersuisut nalilerpassuk inassutigineqartut tamarmik akornanni isiginnaartitsinermik ingerlataqarnermut tunngatillugu annertuumik paasisimasaqartoqaraniluunniit siulersuinermik ilisimasaqartoqanngitsoq, taava Naalakkersuisut inassuteqaatigineqartussatut pisinnaatitaasut nutaamik inassuteqaateqaqqulugit qinnuigisinnaassavaat, siulersuisunut ilaasortat ataatsimut taamatut piginnaasaqarnissaat pillugu inatsimmi piumasaqaatigineqartup naammassineqarnissaa siunertaralugu.

Naalakkersuisut siulersuisut tamaasa isigalugit taaneqartunik piginnaasaqarnissaasa qulakkeernissaat eqqarsaatigalugu inuit inassuteqaatigineqartussatut pisinnaatitaasut akornanni imaaliiallaannaq toqqaasinnaapput.

Imm. 3

Toqqaanermut atatillugu imm. 3-mi aalajangersarneqarpoq, Naalakkersuisut aalajangissagaat ilaasortatut toqqaarneqartoq kina siulersuisut siulittaasuattut inissinneqassasoq. Toqqaarneqartut arlaat kinaluunniit Naalakkersuisut qinersinnaavaat. Siulittaasup inissinneqarnissaanik oqarneq siulittaasup toqqagaasut akornanni suliasamik aalajangersimasumik siulittaasup suliasaanik isumaginninnissamat toqqaarneqarneranut ersiutissaavoq.

Imm. 4

Nammineq kajuminnermikkut isiginnaartitsisartut kattuffeqanngippata imm. 4-p nassataraa Naalakkersuisut taarsiullugu ilaasortamik ataatsimik toqqaasinnaanerat. Taamatut pisoqassappat Naalakkersuisut toqqaasinnaatitaanerata killilerneqarpoq, ilaasortaasup taassuma nammineq kajuminnikkut isiginnaartitsisarnermik ingerlataqarnermik paasisimasaqartuunissaata aalajangersarneqarneratigut. Inatsisissatut siunnersuutip suliarineqarnerata nalaani nammineq kajuminnikkut isiginnaartitsinermik ingerlataqartut kattuffeqanngillat.

Imm. 5

Aalajangersakkap aalajangersarpaa sulisut inassuteqarnerisigut siulersuisuni ilaasortassamik kikkut qinigaasinnaasut qinersisinnaasullu. Tulluartautinneqarpoq sulisut aalajangersimasumik atorfeqartut kisimik qinigaasinnaallutillu qinersisinnaasut. Aalajangersimasumik atorfeqartutut paasineqassaaq sulisoq aalajangersimasumik isiginnaartitsisarfinni sulinissamik isumaqatigiissuteqarsimasoq, taamalillunilu tassaassanani suliamik aalajangersimasumik naammassiniagaqarluni imaluunniit sivikitsuinnarmik sulisorineqartoq.

Imm. 6

Aalajangersakkakkut matumuuna erseqqissarneqarpoq siulersuisuni ilaasortat Kalaallit Nunaanni najugaqartuussasut.

Aammattaaq aalajangersakkakkut erseqqissarneqarpoq siulersuisuni ilaasortat 18-inik ukioqalereersimassasut. Tamatumunnga pissutaavoq siulersuisuni sulinerup akisussaasuuffiunera.

Naggataatigut erseqqissarneqarpoq, siulersuisuni ilaasortat Naalakkersuisuni Inatsisartuniluunniit ilaasortaajutigisinnaanngitsut. Taanna ilanngunneqarpoq Kalaallit Nunaata Isiginnaartitsisarfiata naalakkersuinikkut ingerlatsisunit pituttugaannginnissaata qulakkeerneqarnissaa siunertaralugu. Taamaattumik siulersuisuni ilaasorta q kingusinnerusuk Inatsisartunut ilaasortatut qinigaasoq imaluunniit Inatsisartuni sinniisussatut ilaasortanngortoq siulersuisunit tunuartaqarpoq.

Imm. 7

Siulersuisuni siulittaasup tullia siulersuisut akunnerminni toqqassavaat.

Imm. 8

Aalajangersakkakut erseqqissarneqarpoq siulersuisut piffissaq toqqagaaffiat, ilutigisaanillu erseqqissarneqarpoq toqqarneqaqqinnissaq periarfissaasoq, taamaattoq ataasiaannarluni. Siulersuisunut ilaasortat ataasiaannarlutik toqqagaaqqittarnissaat isiginnaartitsisarfiup nutartertuarneqarnissaanik ineriartortittuarnissaanillu pissuteqarpoq.

Erseqqissaatigineqarpoq piffissami toqqaaffiusumi qaammatisiutit ukiuat malinneqarmat. Piffissaq toqqaaffiusoq siulleg taamaalilluni inatsisip atuunneranit tassaassaaq 1. januar 2011-mit 31. december 2014-imut.

Aalajangersakkami oqaaseqatigiit pingajuanni oqaatigineqarpoq siulersuisuni ilaasortaq siulersuisuni akisussaaffimmik annertuumik sumiginnaasimasoq allatulluunniit siulersuisuni ilaasortaanissamut naleqqukkunnaarsimasoq Naalackersuisunit tunuartinneqarsinnaasoq.

Oqaasertaliuinermi ”siulersuisuni ilaasortaq siulersuisuni akisussaaffimmik annertuumik sumiginnaasimasoq”-mi siunertarineqarpoq siulersuisunut ilaasortanik, taakkua siulersuisutut suliasaminik isumaginninnerat tunngavigalugu tunuartsineq taamaallaat pisinnaammatt, suliaat naammaginnartuunngippat pissutsillu nalinginnaasumik mianersuaalliornertut isigineqarsinnaanngippata. Aalajangersagaq tamatuma kingorna soorlu imaannaanngitsumik sumiginnaasoqarsimatillugu atorneqarsinnaavoq (assersuutigalugu siulersuisut sulineranni peqataasoqarsimanngippat killilimmilluunniit peqataasoqarsimalluni imaluunniit aningaasat atugassarititat i natsisit unioqqutillugit atorneqarsimatillugit imaluunniit missingersuutinik inatsisinik tunngaveqanngitsunik sippuinerit unitsinneqarsimatillugit).

Oqaasertaliuinermi ” allatulluunniit siulersuisuni ilaasortaanissamut naleqqukkunnaarsimasoq”-mi siunertarineqarpoq toqqaasimasutut oqartussaasoq siulersuisunut ilaasortamik, siulersuisuni suli-nermi avataatigut iliuuseqarnermigut suliaminik nangitsinissaminut naleqqukkunnaarsimasumik, taarsiinissaminut periarfissinneqassammat. Matumani pingaartumik eqqarsaatigineqarput pinerluttuliornikkut iliuuseqarnerit, tassunga ilanngullugu aningaasanik peqquserlunneq, soorlu aningaasanik paarisnik atornerluineq, peqquserluttuliorneq, piginnaatitaanermik atornerluineq il.il. Allatulli pinerluttuliornerup taamaattoq kingunerisinnaavaa pineqartoq toqqaasimasutut oqartussaasumit toqqaanermut tunngavigineqaraluartutut tatigineerutissammat. Pinerluttuliornertut iliuuseqarneq taarsiinissamut pissutaatinneqarsinnaappat, pisut toqqaasimasutut oqartussaasumit naliliivigineqarnerat taamaallaat tunngaviussaaq. Pinerluttuliornertut iliuuseqarnerit saniatigut siulersuisunut ilaasortap piukkunnaateqannginnera tunngavigalugu aammattaaq tunuartinneqarsinnaavoq, pineqartoq iliuuseqarnermigut sumiginnaanermigulluunniit imaluunniit sumiginnaanermigut siulersuisut soqutigisaattut sulinissaminut piumassuseqannginnini piginnaassuseqannginniniluunniit erseqqissumik takutippagit. Toqqaasimasutut oqartussaasup soqutigisaani sulinissamut piumassuseqannginneq piginnaassuseqannginnerluunniit taamaattoq namminerimi tunuartsinermut tunngavilersuutigineqarsinnaanngilaq.

Imm. 9

Siulersuisut Naalackersuisut tungaannut Kalaallit Nunaata Isiginnaartitsisarfiata sulinissaanut aalajangersakkat maleruarneqarnissaannut, tassunga ilanngullugu aammattaaq aningaasaqarnermut akisussaaffimmut pingaarnertut akisussaaffeqarnerat pissutigalugu, naleqquttutut isigineqarpoq Naalackersuisut siulersuisut aningaasarsiaannut aamma siulersuisunut ilaasortat aningaasartuutaasa taarsiivigineqarnissaannut aalajangersakkanik aalajangersaasinnaanerat periarfissinneqassappat, tassunga ilanngullugit ilaatigut Kalaallit Nunaata Isiginnaartitsisarfiata suliaasa ataanni angalaner-
nut, nerisaqarnermut najugaqarnermullu aningaasartuutaat. Inatsisitigut tunngavissaq taamaangajat-

toq Radiukkut fjernsynikkullu aallakaatitsisarneq pillugu Inatsisartut peqqussutaanni nr. 6-imi 14. november 2004-meersumi takuneqarsinnaavoq KNR-imi siulersuisut pineqartillugit, aammalu Inuussutissarsiutitigut ilinniartitaanerit inuussutissarsiutitigullu ilinniartitaanermi pikkorissarnerit pillugit Inatsisartut inatsisaat nr. 10 19. maj 2010-meersoq, tunngaviusumik ilinniarfinni siulersuisut pineqartillugit. Tassunga atatillugu malugeqquneqarpoq KNR aamma tunngaviusumik ilinniarfiit aaqqissuussaananermikkut Kalaallit Nunaata Isiginnaartitsisarfiatut inissisimmammata, tassalu imaappoq pisortat sullissiveqarfiisut namminersortutut.

Naalackersuisut inatsisitigut tunngavissaq aningaasarsiat aamma aningaasartuutit taarsiivigineqar-tarnerat pillugu aalajangersaanissaminut atussallugu naatsorsuutigaa. Tamatuma aningaasaqarnik-kut kingunerisassai nalinginnaasumik nassuiaatini nassuiarneqarput. Siullermik malugeqquneqas-saaq siulersuisunut ilaasortat sullissiveqarfiup suliaani angalanermut, nerisaqarnermut najugaqar-nermullu aningaasartuutaat malittarisassat Kalaallit Nunaanni tjestemandinut atuuttut malillugit taarsiivigineqassammata. Aningaasarsiat amerlassusissaat tunngaviusumik ilinniarfinni siulersuisut aningaasarsiaattut amerlatigitillugit aalajangersarneqarnissaat naatsorsuutigineqarpoq, tamatu-munnga tunngatillugu takuuk siunnersuummi aningaasaqarnikkut kingunerisassat nassuiarnerat.

§ 5-imut

Aalajangersakkakkut tassuuna erseqqissarneqarpoq siulersuisut Kalaallit Nunaata Isiginnaartitsisar-fianut qullersatut inissisimasut. Tamatuma kingorna erseqqissarneqarpoq siulersuisut Kalaallit Nu-naata Isiginnaartitsisarfiata ingerlanneqarneranut aalajangersakkat malinneqarnissaannut Naalak-kersuisunut qullersaallutik akisussaasuusut.

Ilanngullugu oqaatigineqassaaq siulersuisut qullersaallutik akisussaaffiannut ilaareemat, malerua-gassat allat Kalaallit Nunaata Isiginnaartitsisarfianut atuuttut eqquutsinneqarnissaat.

§ 6-imut

Imm. 1

Kalaallit Nunaata Isiginnaartitsisarfiata missingersuusiat pillugit aalajangiinissaq siulersuisut pisus-saaffigaat. Missingersuutinut siunnersuut isiginnaartitsisarfiup pisortaanit suliarineqassaaq, siuler-suisunullu akuersissutigisassatut inassutigineqassalluni, tak. § 7, imm. 1. Tassunga atatillugu oqaa-tigineqassaaq, missingersuusiat Aningaasanut Inatsimmi killiliussatut aalajangiussat iluanniissasut, aamma Namminersorlutik Oqartussat missingersuusiorarneq pillugu maleruagassiaannik il.il. eq-quutsitsissasut, siunnersuummi § 10, imm. 3 takuuk.

Aammattaaq siulersuisut suliassaraat, Kalaallit Nunaata Isiginnaartitsisarfiata ukiumut isiginnaartit-sissutigineqartussatut pilersaarutai pillugit aalajangiinissaq, tak. § 7 imm. 1. Isiginnaartitsissutissa-nut pilersaarutit angalanissanut pilersaarutinik ilaqarsinnaapput.

Imm. 2

Siulersuisut ukiunut sisamanut sivitsorneqarsinnaasumillu isiginnaartitsivimmi pisortamik atorfinit-sitsissapput. Taamaalillutik siulersuisut isiginnaartitsisarfiup pisortaanik atorfinitsitsinissamut so-raarsitsinissamullu oqartussaasuupput. Isiginnaartitsisarfiup pisortaanik atorfinitsitsinerup piffissaa aalajangersimasuuvoq isiginnaartitsisarfiup pisortaata angusaqarnissaanik piumasaqarnissaaq inger-latitsilluarnissarlu qularnaarumallugit.

Imm. 3

Siulersuisut suleriaasissartik Inatsisartut inatsisaata matuma periarfissarititaasa iluanni namminneq aalajangersassavaat.

§ 7-imut

Imm. 1

Aalajangersakkakkut erseqqissarneqarpoq isiginnaartitsivimmi pisortap Kalaallit Nunaata Isiginnaartitsisarfiata ulluinnarni aqunneqarnera isumagisarigaa. Tamanna isumaqarpoq siulersuisut tunaartassiaat aalajangiinerilu isiginnaartitsisarfiup pisortaata malitassarigai. Aammattaaq isiginnaartitsisarfiup pisortaa missingersuutitut isiginnaartitsissutigineqartussatullu pilersaarutissanut siunnersuusiortassaaq taakkulu siulersuisunit akuerineqartussatut inassutigisassallugit.

Imm. 2

Aalajangersakkakkut erseqqissarneqarpoq isiginnaartitsisarfiup pisortaa Kalaallit Nunaata Isiginnaartitsisarfianni sulisunik allanik atorfinitsitsinissamut soraarsitsinissamullu oqartussaasuusoq. Sulisunut allanut ilaapput Kalaallit Nunaata Isiginnaartitsisarfianni pisortap saniatigut sulisut allat, matumanittaaq assersuutigalugu allaffissornermi pisortaq, isiginnaartitsisartut, teknikerit, isiginnaartitsisarfeqarnermi siunnersorti aamma ilinniartitsisut avataaneersut.

§ 8-mut

Oqaasertaliinikkut pingaartillugu ersersinniarneqarpoq siunertarineqarmat illuinnaasiunngitsumik isiginnaagassiortarnissaq, isiginnaagassiat pitsaasuussasut aamma isiginnaartitsinikkut eqqumiitsulianik pilersitsisoqassasooq.

Kalaallit Nunaata Isiginnaartitsisarfiata illuinnaasiunngitsumik isiginnaagassiortarnissaanik piunarsaqaat ilanngunneqarpoq Kalaallit Nunaata Isiginnaartitsisarfiata ingerlalluarnissaata qularnaarneqarnissaa siunertaralugu. Eqqumiitsuliorinikkut pitsaasumik avatangiiseqartoqassaaq, isiginnaartitsinikkut eqqumiitsuliornermut inerisaanissamut kajuminnarsaasumik. Illuinnaasiunngitsumik pilersitsisarnissaq aamma tunngassuteqarpoq Kalaallit Nunaata Isiginnaartitsisarfiata kalaallit kulturiannik ileqqutoqaannillu aammattaaq nunanut tamalaanut sammisumik aallaaveqassaaq, aallaaveqassamat, ilutigisaanillu qanorluunniit ukiulinnut tamanut takutitseriatsit tamatigoortut isumagissallugit, tak. ataaniittut.

Isiginnaagassiat pitsaalluinnartuunissaannik piunarsaqaat nunagisami inuussutissarsiutigalugu isiginnaartitsisarfinnik pilersitsinissamut toqqaannartumik atavoq, inatsisissatut siunnersuutip siunertaasa anguneqarnissaannut tunngatillugu iluaqutaasussamik, tak. § 1-imi inuussutissarsiutigalugu isiginnaartitsisarnerup inatsisitigut killiliussivigineqarnissaata qularnarnissaa, isiginnaartitsisarnermik ingerlataqarnerup siuarsarnissaa kiisalu inuussutissarsiutigalugu namminerlu kajuminnikkut isiginnaartitsisarnermik ingerlataqarnerup nuna tamakkerlugu siuarsarlugulu ineriartortinnissaanik siunertaqarneq. Suliassat suunerisa allaaserinerisa ilaa taanna Kalaallit Nunaata Isiginnaartitsisarfiata nunami maani isiginnaartitsisartunut allanut kajumissaasuunissaanut tunngatillugu pingaaruteqarpoq.

Isiginnaartitsissutissat isiginnaartitsinikkut eqqumiitsuliornerup iluaniinnissaannik aalajangersaannikkut assigiinngisitaartitsinissaq periarfissaqarlualerpoq, tamannalu aammattaaq illuinnaasiunngitsunik pilersitsinissamut atatillugu isiginiarneqassaaq. Taamaattumik piunarsaqataannigilaq isiginnaartitsisariaatsit imaluunniit aalajangersimasumik sammisaqarfiusut tamakkerlugit Kalaallit Nunaata Isiginnaartitsisarfiata isiginnaartitsissusiortassasooq, kisianni nikerartitsinissaq inerisaanissarlugu periar-

fissaqarput. Assersuutigalugu Kalaallit Nunaata Isiginnaartitsisarfia isiginnaartitsineq pingaerneru-tillugu aammali misileraanertaqarsinnaasunik, qitinnernik il.il. suliaqarsinnaavoq. Isiginnaartitsine-rup qanoq isumaqartinneqarnissaanut tunngatillugu § 2, imm. 1-imut nassuiaatit innersuutigineqas-sapput.

Naalackersuisuniit pingaartinneqarpoq Kalaallit Nunaata Isiginnaartitsisarfiata sulinera aallaavittut kalaallit kulturiannik ileqqutoqaannillu tunngaveqassasoq. Tamatumani kisimik pingaartutut pine-qanngillat kalaallit isiginnaartitsisarnermi kulturiat isiginnaartitsinikkullu ileqqui, kisiannili kalaallit kulturiat ileqqutoqaallu tamakkiisumik pineqarlutik. Tamatumunnga ilaasutut Naalackersuisut pin-gaartippaat kalaallit kulturiat isiginnaartitseriaasi allu siuarsaavigineqassasoq, tamatumunnga ilann-gullugit inngerneq uaajeernerlu. Oqaatsimi “aallaavittut tunngaveqassasoq” siunertaavoq isiginnaar-titsisarfiup ilaata aamma kalaallit kulturiannit ileqqutoqaanniillu aammattaarli nunanut tamalaanut sammisumik allaanerusumik tunngaveqarsinnaanera. Tamanna ima paasineqassaaq Kalaallit Nunaata Isiginnaartitsisarfia nunap isiginnaartitsarfiatut aammattaq nunarsuarmioqatinut qanillattornermi nunani tamalaani isiginnaartitsisarfiatut naatsorsuunneqassasoq. Taamaalilluni siunnersuummi § 9, imm. 2 ilanngunneqarpoq, tassa Kalaallit Nunaata Isiginnaartitsisarfia aammattaq nunani allani angalaartassasoq.

Taamatut oqaasertaliinikkut isiginnaartitsisarfiup eqqumiitsuliornikkut kiffaanngissuseqarnera aku-liuffigineqanngilaq.

Aalajangersakkap naggataatigut peqqusissutigaa Kalaallit Nunaata Isiginnaartitsisarfiata qanorluun-niit ukiulinnut tamanut takutitseriaatsillu tamatigoortut isumagissagai. Tamanna illuinnaasiunngit-sumik pilersitsinissamut qulaani taaneqartumut qanippoq. Takutitseriatsit tamatigoortut qanorluun-niillu ukiulinnut tamanut imminnut ataqatigiisillugit isigineqassapput. Siullertut pingaarnertullu aalajangersakkap nassataaraa Kalaallit Nunaata Isiginnaartitsisarfiata isiginnaartitsissutimini mee-qat, inuusuttut, inersimasut utoqqaallu isiginnaagassaqartissagai. Tamakku tassaasinnaapput isigin-naartitsinerit meeqqanut inuusuttunullu pingaarnertut sammitinneqartut. Takutitseriaatsinut tamati-goortunut tunngatillugu periarfissat assigiinngitsut ilaatinneqarsinnaapput, soorlu assersuutigalugu oqaatsit, oqaatsit immikkut inuusuttunut imaluunniit utoqqaanerusunut sammitinneqartut, isigin-naartitsinermi, isiginnaartitsinikkut eqqumiitsuliornermi atortunik elektroniskiusunik atuineq, isi-ginnaartitsiviup aaqquissuunnera, init allarpasuillu.

§ 9-mut

Imm. 1

Aalajangersakkakkut erseqqissarneqarpoq Kalaallit Nunaata Isiginnaartitsisarfiata nunap isiginnaar-titsisarfiatut isiginnaartitsisarnikkut pilersitami inunnit amerlasuunit takuneqarsinnaasunngortissal-lugit pisussaaffigigaa. Tamatumuunattaq oqariartuutigineqarpoq Kalaallit Nunaata Isiginnaartitsi-sarfiata pilersitai nunap kulturikkut eriagisassaataanut ilaassasut, atorneqassasut piunnartinneqassa-sullu. Tamanit takuneqarsinnaasunngortitsinissaq pisinnaavoq aliikkusersuiartorluni angalanertigut, radiukku tv-kkullu aallakaatitsinikkut, kiisalu immiussanik tuniniaanikkut. Aliikkusersuiartorluni anganerit pillugit imm. 2-mut nassuiaatit innersuussutigineqarput. Radiukku tv-kkullu aallakaatit-sinerit KNR imaluunniit sumiiffinni ataasiakkaani radiukku tv-kkullu aallakaatitsisarfiit suleqatiga-lugit pisinnaapput. Aalajangersakkami radiukku tv-kkullu aallakaatitsinernut piumasaqaatinik aala-jangersaasoqanngilaq. Tamakku illuatungeriinni isumaqatigiinniutigineqartassapput. Immiussanik tuniniaaneq pisinnaavoq innuttaasunut, suliffeqarfinnut, soorlu atuarfinnut il.il. kiisalu siammarteri-vinnut.

Imm. 2

Aliikkusersuinarluni angalasarnernut tunngatillugu imm. 2-kkut Kalaallit Nunaata Isiginnaartitsisarfia pisussaaffia, tak. imm. 1, erseqqissarneqarpoq, aalajangerneqarmat Kalaallit Nunaata Isiginnaartitsisarfia aliikkusersuiartorluni angalanerini nuna tamaat angalaffigineqassasoq. Matumani siunertarineqarpoq angalaarluni isiginnaartitsiartornermi sumiiffiit qanittumiittut ungasissumiittullu ilaatinneqarnissaat. Taamaattoq oqaatigineqassaaq aalajangersagaq angalasarnernut annertunerusunik piumasqaateqarfiunngitsoq. Taamaallilluni pilersitat tamarnik angalanikkut saqqummiunneqarnissaat imaluunniit illoqarfiit tamaasa piffissap aalajangersimasup iluani ornillugit saqqummiiviginissaat piumasqaataangilaq.

Aalajangersagaq naggataatigut Kalaallit Nunaata Isiginnaartitsisarfia nunani allani aliikkusersuinarluni angalasarsinnaanernut pisinnaatitsivoq. Taamaattumik takuneqarsinnaavoq nunani allani angalasinnaaneq periarfissaasoq, tamannali nunami maani aliikkusersuinarluni angalasarnissanut naleqqiullugu pingaarnerpaangilaq.

§ 10-mut

Imm. 1

Aalajangersakkakut erseqqissarneqarpoq aningaasanut inatsimmi Kalaallit Nunaata Isiginnaartitsisarfia Namminersorlutik Oqartussanit nammineq kontomigut pingaarnikkut aningaasalersorneqassasoq. Suliareqquneqartut aningaasanut inatsimmi aningaasaliissutit iluanni suliarineqassapput.

Imm. 2

Aalajangersakkakut imm. 1-imut nangissutitut erseqqissarneqarpoq Kalaallit Nunaata Isiginnaartitsisarfia isiginnaartitsisarfia taassumaluunniit ingerlatsinerata aningaasalersornissaanut aningaasaateqarfinnit avataaniilluunniit aningaasaliisartunit allanit qinnuteqarnissaminut mattunneqanngitsoq. Aningaasat taakku Kalaallit Nunaata Isiginnaartitsisarfia killilersorneqarani atorsinnaavai.

Imm. 3

Kalaallit Nunaata Isiginnaartitsisarfia pisortanit suliffeqarfiunermi kingunerisaanik naatsorsuuserinermut maleruagassat, ilanngullugit Namminersorlutik Oqartussat missingersuusiornermut maleruagassaat, eqquatsissavai.

§ 11-mut

Imm. 1

Aalajangersakkakut Kalaallit Nunaata Isiginnaartitsisarfia pisussaaffilerneqarpoq ukiunik arlalinik sivilissuseqartussamik isiginnaartitsisartussamik ilinniartitsinermik pilersitsinissamut, isiginnaartitsisartunik ilinniartitsinissaq siunertaralugu.

Ilinniartitaanerup Silamiunit saqqummiussaq aallaavigalugu ukiunik marlunnik sivilissuseqarnissaa isumaliutigineqarpoq Kalaallit Nunaannilu ilinniagaqarnersiuteqarfiusumik ilinniarsimasutut inuussutissarsiutaasinnaassalluni. Ilinniartitaanerup Danmarkimi nunanilu avannarlerni allani imaaliallaannarluni inuussutissarsiutaasinnaanera naatsorsuutigineqarsinnaangilaq, tassami nunani taakkunani isiginnaartitsisartutut ilinniartitaanermi appasinnerussagami. Kalaallit Nunaata Isiginnaartitsisarfia ilinniakkap aqqissugaanernut allaasereqquneqassaaq Kalaallit Nunaata avataani isiginnaartitsisartunngornianik ilinniartitsinernut sapinngisamik annertunerpaamik naleqqussarneqartumik, isiginnaartitsisartunngorniat nunatsinneersut nunani allani qaffasinnerusumik ilinniagaqaaqqikkumasut ilinniarnerminnik sivikillisaanneqarsinnaaqqullugit. Nalinginnaasumik nassuiaatit aamma innersuussutigineqarput.

Imm. 2

Aalajangersarneqarpoq Naalakkersuisut Ilinniartitsinermut Siunnersuisoqatigiit, isiginnaartitsisartut ilinniakkap pitsaasuunissaata qularnaarnissaanik siunertaqartut pilersissagaat, aamma Naalakkersuisut Ilinniartitsinermut Siunnersuisoqatigiit katitigaanerat suliasallu pillugit aalajangersagaliussasut.

Siunnersuisoqatigiit Naalakkersuisunut aamma Kalaallit Nunaata Isiginnaartitsisarfianut siunnersuisassapput, aamma Kalaallit Nunaata Isiginnaartitsisarfianni ilinniartitsinermut pisortanik apeqqutit suliamut tunngassuteqartut pillugit isumasioqateqartarnermikkut qularnaassaavaat, ilinniakkap naammaginatsumik pitsaassuseqarnissaa. Tamatumunnga atatillugu piumasaanngilaq, ilinniakkap Nunani Avannarlerni ilinniakkat assingusut qaffaseqatigissagai, tak. qulaani imm. 1-imut oqaaseqaatit. Imm. 3-mut oqaaseqaatini erseqqinnerusumik allaaserineqartut, Ilinniartitsinermut Siunnersuisoqatigiit Kalaallit Nunaata Isiginnaartitsisarfiata ilinniakkamik aqqissuussinissamut siunnersuusaa pillugu tusarniaavigineqassapput.

Imm. 3

Aalajangersakkap Naalakkersuisut Kalaallit Nunaata Isiginnaartitsisarfiata isumasioereerlugu pisinnaatippai isiginnaartitsisartunik ilinniartitsineq pillugu erseqqinnerusunik aalajangersaanissamut, tamatumunnga ilanngullugit ilinniartussanik akuersisarneq, ilinniartitsineq aamma soraarummeernermut uppernarsaatit. Takorloorneqarpoq aalajangersagaq taanna ilinniakkamut pingaarnerusutigut killiliussat aalajangersarnerannut atorneqarsinnaassasoq, kisiannili ilinniakkap imarisai ilinniakkap aqqissugaanerata allaaserineratigut aalajangersarneqarlutik, taannalu Kalaallit Nunaata Isiginnaartitsisarfianni Ilinniartitsinermut Siunnersuisoqatigiit tusarniaavigereerlugit Naalakkersuisunut akuersisatut saqqummiunneqassaaq.

§ 12-imut

Aalajangersakkakkut oqaatigineqarpoq Kalaallit Nunaata Isiginnaartitsisarfiata kikkunnut tamanut isiginnaartitsinermik ingerlataqartunut soqutigisaqartunulluunniit pikkorissartitsinermik neqeroorteqarsinnaasoq. Aalajangersakkamut siunertaavoq Kalaallit Nunaanni isiginnaartitsisarnermik ingerlataqarnerup ineriartorteqqinneqarnissaata tunngavissioornissaa, inuussutissarsiutigalugu namminerlu kajuminnikkut isiginnaartitsisarnermik ingerlatsisut nutaanik isumassarsiornissamut nutaanillu ilisimasaqalernissamut periarfissinnerisigut. Aalajangersagaq kikkunnut tamanut isiginnaartitsinermik ingerlataqartunut, matumanittaaq isiginnaartitsisartunut, ilitersuisartunut ungalequtsersuisunullu pikkorissartitsinissamut imaluunniit suliaqaatigalugu sammisaqartitsinissamut periarfissisutaavoq. Aammattaaq inunnut isiginnaartitsinermut soqutigisaqartunut pikkorissartitsinermik workshopertitsinermillu neqerooruteqarfiusinnaavoq. Tamanna ilaatigut inuusuttunut isiginnaartitsisartutut ilinniagaqarnissamik isumaliuteqartunut workshopertitsinerusinnaavoq.

Taassumunnga immikkut aningaasaliisoqarnissaa eqqarsaataanngilaq, taamaattumik siunertamut naapertuuttutut isigineqarpoq pikkorissartitsinerit imaluunniit suliaqaatigaluni sammisaqartitsinerit taamaattut Kalaallit Nunaata Isiginnaartitsisarfiata akilersillugit ingerlattassappagit.

§ 13-imut

Nammineq kajuminnikkut isiginnaartitsisarfinnut aamma sumiiffinni ataasiakkaani isiginnaartitsisarfinnut allanut tunngatillugu ilitersuisarnissamut Kalaallit Nunaata Isiginnaartitsisarfiata immikkut pisussaaffeqarpoq, tamanna aalajangersarneqarpoq nammineq kajuminnikkut isiginnaartitsisarfiit aamma najukkani isiginnaartitsisarfiit allat ingerlatsinerat aammalu kalaallit isiginnaartitsinikkut

eqqumiitsuliornernik isiginnaartitsinermilu kulturimik ineriartortitsinissamut pingaaruteqarnerat paasilluarlugu. Tamatumunngalu atatillugu pitsaasutut isigineqarpoq erseqqissassallugu saaffigineqarnikkut Isiginnaartitsisarfik atuarfinnik ilinniartinnillu isiginnaartitsinermik ilitsersuisinnaassa-soq. Tamanna pinngitsoornani pisussaaffiunngilaq taamaattumillu sukkulluunniit periarfissaqar-nermik aallaaveqassalluni. Kalaallit Nunaata Isiginnaartitsisarfia suliap tamatuma isumaginissaanut isiginnaartitsinermut siunnersortimik atorfinitsitsinnaassaaq. Tamanna Kalaallit Nunaata Isigin-naartitsisarfianut missingersuutini siumut naatsorsuutigineqarpoq. Tamatumunnga tunngatillugu aningaasaqarnikkut kingunerisassat pillugit nalinginnaasumik nassuiaatit takooqquneqarput.

Ilitsersuinissamut pisussaaffik erseqqinnerusumik aalajangersarneqanngilaq, tassami ilitsersuineq maannakkorpiaq pisariaqartitanut kissaatinullu, kiisalu periarfissanut takussutissaassammat. Ilitsersuiner-mi makku ilaasinaapput: isiginnaartitsissutissat, ilitsersuiner-mut ikiorsiineq, teknikkikkut siunnersuineq, isiginnaartitsinermut ilitsersuineq/suliaqaatigaluni sammisaqartitsineq aamma isi-ginnaartitsissutissanik allaaserinnineq.

§ 14-imut

Aalajangersakkami aalajangersarneqarpoq isiginnaartitsisarfinnut allanut tapiissuteqarsinnaanis-saannut piginnaatitsissuteqarnissaq, taakkununnga ilanngullugit isiginnaartitsivinnut allanut isigin-naartitsinermillu suliniutinut kulturimut aningaasaliissutinit aamma tipsernermit lottornermillu iser-titanit tapiissuteqartoqarsinnaasoq, kulturikkut ingerlatsineq sunngiffimmilu sammisasaqartitsineq pillugit Inatsisartut peqqussutaanni nr. 10-mi, 21. maj 2002-meersumi kapitali 8 aamma tipserner-mit lottornermillu isertitat agguanneqartarnerat pillugu Inatsisartut inatsisaat nr. 7, 1. juni 2006-imeersoq naapertorlugit.

Isiginnaartitsisarfiit allat isigineqassapput Kalaallit Nunaata Isiginnaartitsisarfianit allaasutut. Isi-ginnaartitsisarfiit allat ilaatigut tassaassapput sumiiffinni ataasiakkaani eqqumiitsuliornikkut isigin-naartitsisarfiit. Tamatumunnga aamma ilaapput nammineq kajuminnikkut isiginnaartitsisarfiit. Taamaattoq piumasagaataavoq isiginnaartitsisarfiit isiginnaartitsisarnermik eqqumiitsuliornertut ingerlataqartuussasut. Tassuunakkut piumasagaataavoq isiginnaartitsisarfiit sulinerat naammaginar-tumik qaffasissuseqassasoq.

Aalajangersakkakkut ilanngullugu oqaatigineqarpoq aalajangersagaq manna malillugu tapiissutit ingerlatsinermut tapiissutit pilersitsinermullu tapiissutit tunniunneqarsinnaasut. Inatsisini taane-qartuni ingerlatsinermut tapiissutit pilersitsinermulluunniit tapiissutit tapiissuteqarnissaq akor-nutissaqanngilaq.

§ 15-imut

Imm. 1

Aalajangersakkami aalajangersarneqarpoq Inatsisartut inatsisaat 1. januar 2011-mit atuutilissasoq. Naapertuussorineqarpoq inatsisip ukiup aningaasanut inatsiseqarfiusup aallartinnerani atuutilernis-saa. Tamatumunnga peqatigitillugu taamaaliornikkut siulersuisut inatsisip atuutilerneranut atatillugu toqqarneqarnissaannut piffissaqarluarluni siulersuisunik toqqaanerup aallartinnissaanut periarfissii-soqassaaq.

Imm. 2

Aalajangersakkami isiginnaartitsisartut ilinniartitaanerup 1. august 2011-mit atuutilersumik aat-saat pilersinneqarnissaa aalajangersarneqarpoq. Tamatumunnga tunuliaqutaasoq pillugu nalingin-naasumik nassuiaatinut innersuussutigineqarpoq.